

**Izi ọma lele kpa
Makị
gbarụ a n'ọkwukwo
Nhne gbasiri ọkwukwo ka**

Izi ọma lele kpa Makị gbarụ a n'ọkwukwo jiri mkpuru ọka ka panizo, “Ọpanizo izi ọma Jizọsi Karaịsi, Nnwọ Chiokike.” Makị gesiri nụ Jizọsi bụ badnụ ke nọornu ọrnụ ndu-ẹhni nụ nye nwernu rikne. Iknernema a whuyaru iwhe nụ nhne o znirni, nụ rikne megidne ọrnwụ ojo, nụ rikne ọ gbarụnụ ele badnụ mmehie. Jizọsi kwuru ẹhni a Nnwọ ke Badnụ, nye varụ o gweru bụdnụ a nyee ma ọ dọhia ele badnụ hite nụ mmehie be.

Makị gbarụ nhne Jizọsi mernu karụ ikwu-ọnu o kwuru nụ nhne o znirni. Ọ gbarụ nhne matị gbasiri Jọni Nye Wụ Mini, ọwuwu mini a, nụ ọrnurna Jizọsi. O znernu nụ ruwhnu kwu nhne gbasiri ele sno apna Jizọsi nụ ele irno a. N'ipne-aznụ ọkwukwo a, o kwuru gbasiri ọrnwụ Jizọsi nụ olizọ n'ẹnwụ a.

Nhne zị n'ọkwukwo ka

Ọpanizo izi ọma (1:1-13)

Ọrnụ Jizọsi nụ rime Galili (1:14--9:50)

Jizọsi znirni nhne rnụ ọrnụ ndu-ẹhni nụ Judiya (10:1-52)

Hite nụ Galili dụ Jeruselem (11:1--15:47)

Olizọ n'ẹnwụ Jizọsi (16:1-8)

Jizọsi gesiri ẹhni a, mekwọ lahna oligwe (16:9-20)

Nye gbarụ ọkwukwo ka: Makị

Risi nhne o kwno gba a: O gesi nụ Jizọsi bụ Nnwọ Chiokike, hite nụ ẹrnu ndu-ẹhni a.

Ikwu-ọnu Jọni

Nye Wụ Mini

(Mat 3:1-12; Luk 3:1-18; Jọn 1:19-28)

¹ Ọpanizo izi ọma Jizọsi Karaịsi, Nnwọ Chiokike.

² Lele kpa Azaya nye ọwhnurninya gbarụ a n'okwukwo, Chiokike karụ,

“Bno nsni, le, m neezizne nye izi m nụ ruwhnu i, nye jeemekwata apna i.

³ Akpiri otu badnụ nọokpo okwo n'eli-ikpa, naakaa, ‘Anụ mekwata apna Nyenwe aị, anụ mee ma apna a sniri asni.’ ”

⁴ Jọni Nye Wụ Mini bụ nye wam whụyaru iwhe n'eli-ikpa nọokpo okwo naakaa ele badnụ tughnasna mkpoma ma be wụ be mini, ma Chiokike gbarunu be mmehie.

⁵ Kpakara ele zị nụ mgbu Judiya nụ ẹli Jeruselem whokwnusiri a. Ọ wụ be mini n'Osimini Jodani, be nookwuhia mmehie be.

⁶ Jọni wogwu iwo rijni akpukpo anohia be kwu kameli. Ajni ọ snụ n'ikwnu bụ akpukpo anohia. Wiri a bụ igwurube nụ mọno ebeka ohia.

⁷ Ọ nọokpo okwo naakaa, “Nye kakwo m rikne vawa n'aznụ m, nye me kwésile o whudnahie ẹli toma eriri okoro-ochi a lawuru.

⁸ M ji m mini wụ anụ mini, kọvu nụ nye wam jeeji Enine Nsọ nọowu anụ mini.”

Ọwuwu mini Jizọsi

nụ ọrnurna a

(Mat 3:13---4:11; Luk 3:21,22; 4:1-13)

⁹ N'ige wam, Jizọsi hiri nụ Nazareti ke zị n'ẹli Galili va, Jọni wụ a mini nụ rime Osimini Jodani.

¹⁰ Ngangam Jizọsi hiri nụ mini nọowhuya, ọ whnụnu oligwe hne o kpumernu, ọ whnụ Enine Nsọ hne o neewhekwasị a lele nduru.

¹¹ Otu akpịri hiri n'oligwe kaa, “Ji bụ Nnwọ m me whnụnu n'anya, nhne i masiri m.”

¹² Ngangam Enine Nsọ wam duru a bna ẹli-ikpa.

¹³ O zị n'ẹli-ikpa nri ọbochi ẹno. Ekwensu naarna a ọrnarna, ya nụ rụmu anọhia zị. Kọvu nụ ele enine izi neeznenu a izi.

*Jizọsi sukwuru ele
noogbu aznụ*

(Mat 4:12-22; Luk 4:14,15; 5:1-11)

¹⁴ Nga be yisiri Jọni n'ikelu, Jizọsi znernu Galili neezni izi ọma Chiokike gweyarụ.

¹⁵ O naakaa, “Ige zulem, ẹli-eze Chiokike zị ndundu, anụ tughnasna mkpọma kweru izi ọma.”

¹⁶ Nga o znernu nụ ngeri Osimini Galili, ọ whnụ Saịmoni nụ Anduru nwene a rukna hne be zị nọowu ịgbo nụ rime osimini, kwnornu nụ be bụ ele noogbu aznụ.

¹⁷ Jizọsi kanụ be, “Anụ va sno m n'aznụ, m jeeme anụ bụru ele jọokwnuhia ele badnụ lele kpa anụ noogbu aznụ.”

¹⁸ Ngangam be sịgbasi ịgbo be, sno a.

¹⁹ O zne nụ ruwhnu matị, ọ whnụ Jemisi nnwọ Zebidi nụ Jọni nwene a rukna zị n'ogbo berere, neemekwata ịgbo be.

²⁰ O sukwu be, ngangam be gharụ Zebidi nda be n'ogbo, ya nụ ele be gnornu ẹrnu, snornu a.

*Jizọsi chihalaru
reṅwu ojo*

(Luk 4:31-37)

²¹ Be nọ Jizọsi zne n'eli-ohna Kapanom bna n'oro ọgbako ele Ju n'Ọbochi Ozukwa Inwe neezni nhne.

²² Nhne o neezni duru be ẹhni, kwnornu nọ o znirni nhne lele nye nwernu rikne, ọ bọ lele ele zni iwu ele Ju.

²³ Otu nwerukna reṅwu ojo nwugwu bnanyarnu nọ rime ọro ọgbako be, siwama,

²⁴ “Kini bu nhne aị nọ jị nwekọgwu, Jizọsi nye Nazareti? I varu ma i gbumekwo aị? M maam nye i bu, i bu nye nsọ ke Chiokike.”

²⁵ Jizọsi bigbọru a, kaa, “Kpusnime onu i, hi nọ rime a whuya.”

²⁶ Reṅwu ojo wam dosiri a rikne. O gweru okne nkọli si okokoba, hi nọ rime a whuya.

²⁷ O duru kpakara be ẹhni ke mernu be bete neesikwarita ẹhni be, “Ka bu kini? O bu o zni nhne ikne sa? O nwernu rikne ke o ji nọtunu reṅwu ojo ọka, be bnotenu a nsni.”

²⁸ Be tnsi ọtnutnu a nọ kpakara ẹli Galili.

Jizọsi gwọru ele nriria

(Mat 8:14-17; Luk 4:38-41)

²⁹ Nga Jizọsi hiri n'oro ọgbako ele Ju wam whuya, ya nọ Jemisi nọ Joni, be bna n'oro Saiṃoni nọ Anduru.

³⁰ Ige wam nne nnwerne Saiṃoni dnanyi naaria ẹhni orne bekwnu, ngangam be kanu Jizọsi nhne gbasiri nwerinya wam.

³¹ O znekwunusi a, jiri a n'aka, dolizo a olu. Ngangam ẹhni orne bekwnu wam sigbasi a, o bete neeznenu be izi.

³² N'ogbednachi, nga ehnam dnarnu, be kwuyanü Jizosi kpakara ele nriria, nu ele renwu ojo nwugwu.

³³ Kpakara ele zi n'eli wam gbakoru n'onu-mgbo neelekiri.

³⁴ O gworu agida ele nriria zi odo n'odo, o chimarnu agida renwu ojo. O kwéle renwu ojo kwu oka, kwnornu nu be magwu nye o bu.

*Jizosi znirni izi oma
nu Galili
(Luk 4:42-44)*

³⁵ N'onu osisi, nga chi yobochnage, o lizo zne hne koru owu, neekpe okpukpe.

³⁶ Saimoni nu ele ya nu be zi noopio a.

³⁷ Nga be pioharu a, be kanu a, "Kpakara ele badnu noopio i."

³⁸ Kovu Jizosi kanu be, "A jeezne n'eli ele ke berere ma m zni m be izi oma, kwnornu ka bu nhne me kwnornu va."

³⁹ O zne nu rime kpakara oro ogbako ele Ju zi nu kpakara Galili neezni izi oma, chihala masi renwu ojo.

*Jizosi gworu nye nchnichna
(Mat 8:1-4; Luk 5:12-16)*

⁴⁰ Otu nye naaria nchnichna vakwnusiri a, riasno a, gbinu a mpnerne ochi, kaa, "O buru nu i pioru, i nwernu rikne mee m ziri richna."

⁴¹ Jizosi donu a obirizi, dosnima aka a, kpatu a, kaa, "M pioru m, ziri richna."

⁴² Ngangam be gworu a nchnichna wam, o ziri richna.

⁴³ Jizosi doru a aka nu nsni k'agida chihala a.

44 Ọ kanụ a, “Ọ zá nye ọbula ị kanụ, kọvu la, gweru ẹhni ị gesi nye ọkwa ariọhna, gweru masị nhne Mozizi nyernu n'iwu kwa ariọhna ma ọ bụru nhne akebne nyee be nụ ị zị rịchna.”

45 Kọvu ọ whọgaru bete nọotnunu ele badnụ, neewheke ọka wam, ke kpahiaru nụ Jizọsi nwéma rikne berere ọ bna nụ rime ẹli-ọhna hne ele badnụ jọowhnu a, kọvu o znernu hne kọru owu, ele badnụ neehi penupe ọbula naavakwnusi a.

2

*Jizọsi gwọru nye ẹhni a
dọnwurnu ọdonwu
(Mat 9:1-8; Luk 5:17-26)*

1 Nga Jizọsi lahnarnụ n'ẹli Kapanọm, kpa ọbochi ele nụ ele whemernu, agịda ele badnụ nurnu nụ ọ zị n'ọro.

2 Agịda ele badnụ varu jipiya kpa ọ zịma oghere zị, ma n'ọnu-mgbo. Ọ zị masị nookwunu be ikwu-ọnu Chiokike.

3 Be vakwnusi a, vuyanu a otu nye ngeri ẹhni a dọnwurnu ọdonwu, badnụ ẹno vu a.

4 Nga be nwée rikne dụ a ẹhni kwnornu nụ agịda ele badnụ wam, be kọma olu ọro hne ọ zị. Nga be dọkamarnu a, be vudna ọkpata ke nye ngeri ẹhni a wam dọnwurnu ọdonwu danyị.

5 Nga Jizọsi whnurnu ọkwnata ovu be, ọ kanụ nye wam ngeri ẹhni a nwurnu ọnwu, “Nnwọ m, be gbarunam jị kpakara mmehie i.”

6 Kọvu nụ agwna ele zni iwu ele Ju dazị ẹli pịi, zị nẹsikwa nụ mkpọma be,

⁷ “Kini mernu nwerukna ka jiri kwu oka kpa? O kwululem Chiokike. Ndaa nye nwernu rikne o gbaru mmehie hne o buo Chiokike kpoi?”

⁸ Ngangam, Jizosi mahiaru nu rime enine a nu be zi naari oka wam nu rime mkpoma be, o sikwa be, “Kini kpahiaru anu naari oriri ka nu mkpoma anu?”

⁹ Ndaa ke zi ewheke, o kanu nye ngeri ehni a donwurnu odonwu, ‘Be gbarunam ji kpakara mmehie i,’ mofu o kaa, ‘Lizo, chiri etere i, zne izne.’

¹⁰ M pioru m anu mahia nu Nnwọ ke Badnu nwernu rikne n'owa o gbaru mmehie.” Jizosi kanu nye wam ngeri ehni a donwurnu odonwu,

¹¹ “M ka m ji, lizo, chiri etere i, la oro i.”

¹² Ngangam, o lizo, chiri etere a, whoga nu ruwhnu kpakara be, o du kpakara be ehni, be znarni Chiokike, naakaa, “A whnulele nhne nu kpa.”

*Jizosi sukwuru Livai
(Mat 9:9-13; Luk 5:27-32)*

¹³ Jizosi whoga kwno berere nu ngeri Osimini Galili, agida ele badnu vakwnusiri a. O bete neezni be nhne.

¹⁴ Nga o neewhe, o whnu Livai nnwọ Alifayosi, hne o dazi n'oro ntụ. O kanu a, “Sno m.” O lizo snornu a.

¹⁵ O du nga Jizosi dazi neeri wiri n'oro Livai, agida ele ona ntụ nu ele mmehie snornu Jizosi nu ele sno apna a neeri wiri. Ige wam, ele sno a zi agida.

¹⁶ Nga ele zni iwu ele Ju ele bu ele Farisi whnurnu nu ele mmehie nu ele ona ntụ sno a neeri wiri, be sikwa ele sno apna a, “Kini mernu o noosno ele ona ntụ nu ele mmehie neeri wiri?”

¹⁷ Nga Jizọsi n'uru a, ọ kanụ be, “Mkpa dibia ziko naakpa ele ẹhni buru ọma, okwolem ele nriria. M váge m o sukwu ele ọma, okwolem ele mmehie.”

Ajiji gbasiri ovu ọnu

(Mat 9:14-17; Luk 5:33-39)

¹⁸ Ọ dụ nga ele sno Jọni n'uru ele Farisi noovu ọnu, agwna ele badnụ vakwnusi Jizọsi sika a, “Kini mernu ele sno Jọni n'uru ele sno ele Farisi noovu ọnu, kọvu ele sno apna i zá noovu ọnu.”

¹⁹ Jizọsi sarụ be, “Ele varụ hne be nọlu nnwerne ikne be joovu ọnu hne nyerukna wam nọlu nnwerne ikne n'uru be zi? Kpakara ige ke be n'uru nye nọlu nnwerne ikne zi, be jọovu ọnu.”

²⁰ Kọvu ọbochi vawa nga be jaanahọru be nye nọlu nnwerne ikne. Ọbochi wam be joovu ọnu.

²¹ “Ọ zá nye jeegweru mkpekele ikpe ikne dnusni n'iwu ọknani. O mene kpa, iwo ke ikne jodokahala nhne n'ehni ke ọknani. Ọ jodoka ke kakwo agida.”

²² Ọ zi masi nye jeegweru manya ikne gbasiri n'olori akpukpo ọknani. O mene kpa, manya wam jaagbawama, manya n'uru olori akpukpo whume etekne. Kọvu be gbasiri manya ikne n'olori akpukpo ikne.”

Ajiji gbasiri

Ọbochi Ozukwa Inwe

(Mat 12:1-8; Luk 6:1-5)

²³ Ọ dụ n'otu Ọbochi Ozukwa Inwe, Jizọsi n'uru ele sno apna a naagawhe n'esilawuru ẹkwu ikpa. Ele sno apna a bete ọ ghọ ikpa kpa be zenezne.

²⁴ Ele Farisi kanụ a, “Le, kini mernu be neeme nhne kwésile o mee n'Ọbochi Ozukwa Inwe?”

²⁵ Jizọsi sarụ be, “Anụ gwnụna nhne Devidi mernu nga ọ zị nụ mmekpẹhni, nga wiri gwnụrnu a, ya nụ ele snogwu a?”

²⁶ O bnazernu n'oro nsọ Chiokike, nga Abịata bụ nye risi ariohna, o ri brẹdi be bítaru nụ ruwhnu Chiokike ke kwésile n'iwu o ri, okwolem ele ọkwa ariohna bụ ele kwesiri n'iwu o ri a, o nyee masị ele nụ ya snogwu.”

²⁷ Ọ kanụ be, “Chiokike mernu Ọbochi Ozukwa Inwe kwnornu badnụ, be méne badnụ kwnornu Ọbochi Ozukwa Inwe.

²⁸ Ọ nhne kpahịaru Nnwọ ke Badnụ jiri bụru masị Nyenwe Ọbochi Ozukwa Inwe.”

3

Nyerukna aka dọnwurnu ọdonwu

(Mat 12:9-14; Luk 6:6-11)

¹ Jizọsi bna kwno berere n'oro ọgbako ele Ju, otu nwerukna aka dọnwurnu ọdonwu zị pịi.

² Ele Farisi zị neese a, ma ọ jọogwo a n'Ọbochi Ozukwa Inwe, ma be bno a nhne.

³ Ọ kanụ nyerukna wam aka a dọnwurnu ọdonwu, “Lizọ, gwuzoru nụ ruwhnu kpakara ele badnụ.”

⁴ Ọ sịkwa be, “Ọ bụru ọma n'iwu o mee nhne ọma, mọbu o mee nhne bụo ọma n'Ọbochi Ozukwa Inwe? Ọ znọhia bụdnu mọbu o gbu ogbu?”

Kọvu be nyasimernu bidim.

⁵ Nga o lekparụ anya ngaramanga o we ẹhni, o nwe ovu ojo kwnornu nụ mkpọma ojo be. Ọ kanụ nyerukna wam, “Dọsnima aka i.” Ọ dọsnima aka a, aka a bụru ọma lele kpa ọ zị nụ mbọm.

⁶ Ele Farisi whoga, ngangam be nu ele dagwunu Erödu zne gbagidne a iznuznu, kpa be joogbu a.

*Agida ele badnu
snornu Jizosi*

⁷ Jizosi nu ele sno apna a whogaru zne ngeri Osimini Galili. Agida ele badnu hi n'eli Galili snornu a, ma ele hi nu Judiya,

⁸ ma ele hi n'eli Jeruselem, nu eli Idumiya, ma n'obosi ehnam ke Osimini Jodani nu gburugburu Taya nu Saidoni, vakwnusiri Jizosi nga be nurnu kpakara nhne o mernu.

⁹ O kanu ele sno apna a be mee kpa otu ogo matı jaaziri a ndundu kwnornu agida ele badnu wam, o zi be kpagbu a.

¹⁰ Ige wam, Jizosi gwöru agida ele nriria, ke kpaharu agida ele nriria ojo zi odo n'odo nokpu n'ehni a ma be kpatu a aka.

¹¹ Nga obula ele renwu ojo whnurnu a, be dna n'eli nu ruwhnu a, siwama, kaa, "Jiwa bu Nnwö Chiokike."

¹² Jizosi dö be aka nu nsni be meko ele badnu mahia nye o bu.

*Jizosi horuru nri nu
badnu lawuru ele izi
(Mat 10:1-4; Luk 6:12-16)*

¹³ Jizosi pnezne n'olu rugwu, sukwu ele o pioru. Be znekwnusi a.

¹⁴ O horu ele rukna nri nu ebo ma ya nu be daziri, kwu be ele izi, ma o zihala be zne kpö okwo izi oma,

¹⁵ o nyernu be rikne o chihala renwu ojo.

¹⁶ Ka bu nri nu badnu lawuru wam o horuru, Saidoni, nye Jizosi jiri rewhna Pita,

17 nụ Jemisi nnwọ Zebidi, nụ Jōni nwene Jemisi, ọ jì kwno be rẹwhna Banajisi, ke bụ rụmu egbe oligwe,

18 nụ Anduru, nụ Filipu, nụ Batolomi, nụ Matiyu, nụ Tōmosi, nụ Jemisi nnwọ Alifayosi, nụ Tadiyosi nụ Saịmoni nye zị n'esilawuru ele noonwu bẹkwnu nụ mkpọma,

19 nụ Judasị Isikarioti, nye reru a.

Jizọsi nụ Bẹlizibolu

(Mat 12:22-32; Luk 11:14-23; 12:10)

20 Jizọsi bna n'otu ọro, agịda ele badnụ jipiya kwno berere, ke kpayarụ o nwée oghere ri wiri.

21 Nga rụmu nne a nurnu a, be whọga ma be nwugwu a, kwnornu nụ be karu, “Mkpọma a zúle ozu.”

22 Agwna ele zni iwu ele Ju hiri nụ Jeruselem va, kaa, “O nwernu Bẹlizibolu, o ji rikne nye risi rẹnwu ọjọ naachịhala rẹnwu ọjọ.”

23 Jizọsi sukwukọta be, tnunu be elulu zị ọdo n'ọdo, “Setani ọ jaachịhalali Setani?”

24 Ọ bụru nụ ẹli-eze kewama megidne ẹhni a, ẹli-eze wam jóogwuzoli.

25 Ọ bụru masị nụ ezi-nụ-ọro kewama megidne ẹhni a, ezi-nụ-ọro wam jóogwuzoli.

26 Ọ bụru masị nụ Setani lizọru megidne ẹhni a, kewama, o jóogwuzoli, ẹnwu a valẹm.

27 “Ọ zá nye jaabnali n'ọro nye dikne, naahọru a kpakara nhne a, ọ bụru nụ o béle ọsno kne dikne wam eriri. Ige wam o jeenwe rikne naahọru a nhne zị n'ọro a.

28 “Owe! M naakanụ anụ ezi ọka, Chiokike jaagbarụnu rụmu badnụ kpakara arụru-ẹli be ruru nụ ọka ojo be nookwu,

29 Kọvu nye ọbula ke kwuru kwugidne Enine Nso jéenwe ogbarunu tim tòm. Kwnornu nụ nye wam rulam arụru-ẹli nwée ogbarunu ọkwnukokwnu.”

30 Jizọsi kwuru ka kwnornu nụ be naakaa nụ o nwernu renwu ojo.

Nne Jizọsi nụ rụmu nne a

(Mat 12:46-50; Luk 8:19-21)

31 Nne Jizọsi nụ rụmu nne a varu, be gwuzoru n'ederezi, ziznenu a izi, noosukwu a.

32 Agida ele badnụ wam zi a gburugburu kanu a, “Le, nne i nụ rụmu nne i zi n'ederezi noopio i.”

33 Jizọsi sịkwaru be, “Nyele bu nne m nụ rụmu nne m?”

34 O lehnata anya ele dazi a gburugburu, kanu be, “Anu le nne m nụ rụmu nne m.

35 Nye ọbula ke neeme nhne Chiokike noopio, nye wam bu nwene m rukna nụ nwene m rinya nụ nne m.”

4

Elulu nye ogha mkpuru

(Mat 13:1-9; Luk 8:4-6)

1 Jizọsi panizo neezni kwno nhne nụ ngeri osimini. Agida ele badnụ jihiaru hne o zi, ke kpayaru o bnazne n'ogbo, daziri ẹli. Kpakara igbudu badnụ wam gwuzoru nụ mkpomkpo ẹli.

2 O ji elulu neezni be agida nhne zi odo n'odo. Nụ nhne o neezni, o kaa,

3 “Anu bnote nsni, otu nye ernalu ẹkwu znernu agha mkpuru.

⁴ Ọ dụ nga ọ naagha mkpuru, agwna mkpuru dnarnu nu ngeri apna. Rumu onunu tuturu be ta.

⁵ Agwna mkpuru dnarnu n'eli rugwu hne be nwée agida rịzna, ngangam mkpuru wam fuharu, kwnornu nu be nwée agida rịzna.

⁶ Kọvu nga ehnam wasiri, be chnanwu, kwnornu nu be nwée egwnugwu.

⁷ Agwna mkpuru berere dnarnu n'esilawuru igwnu, igwnu wam sohia, kpagbu a, ọ minyinage mkpuru.

⁸ Agwna mkpuru berere dnarnu n'eli buru oma, fuhia, nooso, naaba, mihia nri mkpuru eto, berere nri isunu, berere otu riwhu.”

⁹ Ọ kanu be, “Nye nwernu nsni ọ ji ọ nu nhne, ọ nurnu.”

*Nhne o kwno tnu elulu
(Mat 13:10-17; Luk 8:9,10)*

¹⁰ Nga Jizosi nu ele sno apna a nri nu badnu lawuru wam zi, nu agwna ele berere, be sikwaru a nhne gbasiri agida elulu.

¹¹ Ọ kanu be, “Be mernu anu mahia nhne tugwaru otugwa ke eli-eze Chiokike, kọvu ele zi n'ederezi, be naakanu be kpakara nhne n'elulu,

¹² ma
‘Be neele anya kpoi, gharu ọ whnu,
nonu nu nsni, gharu ọ ghohia,
ọ zi be tuhnasna mkpoma hne Chiokike zi,
nwehia ogbaru.’ ”

*Risi elulu nye
ogha mkpuru wam
(Mat 13:18-23; Luk 8:11-15)*

¹³ Jizọsi sịkwa be, “Anụ ghóhiage elulu ka? Ndaa kpa anụ jeeji ghóhia kpakara elulu?”

¹⁴ Nye ẹrnu ẹkwu naagha mkpuru ghasiri ikwu-ọnu Chiokike.

¹⁵ Mkpuru ele ke dnarnu nụ ngeri apna nụ lele ele ke nurnu ikwu-ọnu wam, kovu nga be nurnu a, ngangam Ekwensu varu gweme oka wam nụ mkpoma.

¹⁶ Mkpuru ke be ghasiri nụ hne rugwu zi nụ lele ele ke nurnu ikwu-ọnu wam, ngangam be gweru snarnima gweru a.

¹⁷ Kovu nụ be nwée egwnugwnu, be dazi ige mati, omekwo, nga mmekpehni mọbu awhnuwghnu varu kwnornu nụ ikwu-ọnu wam, ngangam be dnah-nala aznu.

¹⁸ Mkpuru ke be ghasiri n'esilawuru igwnu nụ lele ele ke nurnu ikwu-ọnu wam,

¹⁹ kovu mmekpehni ke owa ka, nụ aghigho o whnu ẹkwnu n'anya, nụ nkoli ke nhne berere, bnanyarnu, kpagbu ikwu-ọnu wam. O ghọ nhne mina mkpuru.

²⁰ Mkpuru ke be ghasiri n'eli buru oma nụ lele ele ke nurnu ikwu-ọnu wam, be narnu a, o mipiya nri mkpuru eto, berere nri isunu, berere otu riwhu.”

Elulu tonji n'olu ikpechi

(Luk 8:16-18)

²¹ Jizọsi kanu be, “Anụ neegweya tonji bita a nụ mkpururu nkita, mọbu nụ mkpururu okpata? O buo n'olu nhne be bita tonji?”

²² Kwnornu nụ o za nhne be bigwaru abigwa, ke be jeeme o whuya iwghne, be jookpume kpakara nhne be kpusnirni okpusni.

²³ Ọ bụru nụ nye nwernu nsni o ji o nụ nhne, o nurnu.”

²⁴ Ọ kanu be, “Anu bnote nsni nkari nkari nhne anu nonu. Nhne anu jiri tunu nye berere bu nhne be jeeji tunu anu, be jeenye anu karukwo.

²⁵ Nye nwernu nhne bu nye be jeenye, nye nwée, be jaanahoru a, o bubedi ke o nwernu.”

Elulu mkpuru nooso oso

²⁶ Jizosi kaa, “Eli-eze Chiokike nū lele nga badnu kpasiri mkpuru n'eli.

²⁷ O zni anyarna n'abalj tnenya n'iwhnehnie, mkpuru wam fuhia, nooso, nye wam maá kpa o ji neeme kpaam.

²⁸ Eli nū nsnunū a neeme isisi nooso, naamihia mkpuru, ke mbom, o fuhia, omekwo igwugwere, omekwo ikpa karu aka ke hi n'igwugwere.

²⁹ Kovu nga ikpa wam karu, ngangam, o gweru ama bete o gbu ikpa kwnornu n'ige o gwe nhne n'ekwu dulam.”

Mkpuru mositadi

(Mat 13:31,32,34; Luk 13:18,19)

³⁰ Jizosi kaa, “A jeeji kini gbu esni eli-eze Chiokike? Mōbu ndaa kpa a jeeji notnu elulu a?”

³¹ Ọ nū lele mkpuru isisi be kwu mositadi, ke, nga be kpasiri a n'eli, o bu mkpuru isisi zi matj kakwo kpakara mkpuru n'owa.

³² Kovu nga be kpasiri a, o sohia buru nhne kakwo kpakara nhne be kpasiri n'eli, wahia agida nkala hna ezi, ke mernu onunu notnu alikwu nū mkpururu idno a.”

³³ Jizosi jiri agıda elulu nu kpa nookwunu be ikwu-onu Chiokike, lele kpa be jonuli.

³⁴ O kwúgene be ikwu-onu hne o jile elulu. Kovu nga ya nu ele sno apna a kpoi daziri, o kowanu be risi kpakara elulu ka.

*Jizosi bigboru
ruwhere osimini
(Mat 8:23-27; Luk 8:22-25)*

³⁵ O duru n'ogbednachi, o kanu ele sno apna a, “Ngwa ma a whe aka osimini kiyari.”

³⁶ Nga be whogaru n'igbudu badnu wam, be bnakwnusi Jizosi n'ogbo ke o zi, be nu ya snornu. Ogbo ele ke berere sno be.

³⁷ Okne abaka-mini lizo, mini noowubna nu rime ogbo wam, ke kpaharu mini jihia n'ogbo wam.

³⁸ Kovu nu Jizosi zi n'aznu ogbo neezni anyarna n'olu nhne oche-risi. Be kpatnanya a, kanu a, “Nye-zni-nhne, o gbasila i nu a noowhu sa?”

³⁹ O tnenya, bigbo ruwhere, kanu okne osimini, “Udno! Daziri bii.” Ruwhere whebiri, ohna dna bii.

⁴⁰ Jizosi kanu be, “Kini mernu anu notu ogwnu? O bu nu anu nwée okwnata mkpoma sa?”

⁴¹ Be turu ogwnu k'agida, be neesikwarita ehni be, “Nye ka bu nyele? Ke ruwhere nu okne osimini noobnotenu nsni?”

5

*Jizosi gworu nye
renwu ojo nwugwu
(Mat 8:28-34; Luk 8:26-39)*

¹ Jizosi nu ele sno apna a vadu ngeri Osimini Galili kiyari, n'eli ele Gerasa.

² Nga o hiri n'ogbo whuya, otu nyerukna renwu ojo nwugwu hiri nu hne be li iznu kwnusi a.

³ O wu nu hne be li iznu, o zima nye nwernu rikne tu a ijigba,

⁴ kwnornu nu be tusilam a ijigba nu nhne ikelu agida ige, o gbajikwo ijigba, lijikwo nhne ikelu be tugwu a. O zima nye nwernu rikne mee anya dno a.

⁵ Ige obula, abali nu iwhnehnie o zi nu hne be li iznu ma n'olu rugwu, neesi okokoba, gweru akaworugwu buko noodowa ehni a ehni.

⁶ Kovu nga o whnurnu Jizosi nu hne zi ikere, o gba eso, kponu a risi eli.

⁷ O gweru okne nkoli si okokoba, naakaa, "Kini bu nhne me nu ji nwekogwu, Jizosi Nnwọ ke Chiokike Kakwo Nhne Dum Olu?"

⁸ Ka bu kwnornu nu Jizosi kannu a, "Hi nu rime a whuya, ji renwu ojo."

⁹ Jizosi sikwa a, "Kini bu rewhna i?"

O kaa, "Rewhna m bu Lijoni, kwnornu nu a zi agida."

¹⁰ O riasnosi Jizosi rikne o chihala be n'eli wam.

¹¹ Kovu agida ezni zi piam naata wiri nu ngeri rugwu zi ndundu.

¹² Kpakara renwu ojo wam riasno Jizosi, kaa, "Zizne ai nu rime ezni ma a bna nu rime be."

¹³ Jizosi kweru be, kpakara renwu ojo wam whuyaru zne bna nu rime ezni wam, kpakara rumu anohia wam, ke duru pokwu lawuru, gbadnarnu nu ngwulangwu ngeri mini, rinwu nu rime mini.

¹⁴ Ele nooznu be gbawhuru, tnuasi a n'eli-ohna ma nu rime ekwu. Be va whnu nhne mernu.

15 Be vakwnusi Jizọsi, whnụ nye wam agida rẹnwu ojo nwụgwu nụ mbọm, hne ọ dazị ẹli, woru iwo, mkpọma a zumasiri ozu, be tị ogwnu.

16 Ele whnurnu a tnrnu nhne mernu nye wam rẹnwu ojo nwụgwu nụ odokwnu ezni wam.

17 Be bete ariaso Jizọsi ọ whọga nụ ngeri ẹli be.

18 Nga ọ naabna nụ rime ogo, nye wam rẹnwu ojo nwụgwu nụ mbọm riasno a ma o snornu a la.

19 Jizọsi kwéle. Kọvu ọ kanụ a “La n’oro i, lakwnusi ele ke i, tñsinu be kpakara nhne Nyenwe aị mennu, nụ kpa ọ dọnnu i obirizi.”

20 Nwerukna wam la, panizo nọtnu nụ rime Dekapolisi nhne Jizọsi mennu a, o duru kpakara ele badnụ ẹhni.

*Nnwọ rinya matị nụ
nwerinya ntụ ọvnarna*

(Mat 9:18-26; Luk 8:40-56)

21 Nga Jizọsi lahnarnụ aznụ bna n’ogbo dū nū aznū osimini kiyari, agida ele badnū jihiaru nū hne ọ zị. Ọ daziri nū ngeri osimini.

22 Otu nū rime ele risi ọro ogo bako ele Ju, nye rẹwhna a bụ Jariosi, varu, nga o whnurnu Jizọsi, ọ dna n’ẹli n’ochi a,

23 riasno a, kaa, “Nnwọ m rinya matị zị n’onu ẹnwu, va soso tükwasi a aka i lawuru ma i dọhia a, ọ ziri budnu.”

24 Jizọsi snornu a zne. Agida badnū snornu a naakpagbu a.

25 Otu nyerinya ke naarija ntụ ọvnarna nri nū awha lawuru sno nū igbudu ele badnū wam,

26 ke whnurnu agida awnwhnu n'aka agida ele dibia, tuwhukwo kpakara nhne o nweru, kovu o bnana mbnarna obula, o joru bujo ke agida.

27 Nga o nurnu nhne gbasiri Jizosi, o va n'aznu a n'igbudu badnu wam, kpatu iwo a aka,

28 kwnornu nu o karu, "O buru me kpatu iwo a aka kpoi, o jeeme ehni buru m oma."

29 Ngangam onarna a gbabiri, o metu a n'ehni nu be gwolam a nriria ojo wam.

30 Ngangam Jizosi mahiaru nu rikne hilem n'ehni a whoga. O tuhna n'igbudu badnu wam sika, "Nyele kpaturu iwo m aka?"

31 Ele sno apna a kanu a, "I whnurnu igbudu badnu naadnagidne i, i naakaa, 'Nyele kpaturu m aka?' "

32 O le anya gburugburu ma o jowhnu nye ke mernu nhne ka.

33 Nwerinya wam, kpa o mahiaru nhne mernu a, o yahna n'ogwnu naama a ririri, dna n'eli n'ochi a, kowanu a kpakara ezi oka zi a.

34 Jizosi kanu a, "Nwọ m rinya, okwnata mkpoma i zohialam ji, la nu udno, nriria i la."

35 Nga Jizosi kpu oka n'onu, ele hi n'oro nye risi oro ogbako ele Ju wam va, naakaa, "Nwọ i rinya nwunam. Ndaa ke i naakpaknata Nye-zni-nhne ehni?"

36 Jizosi bnoge nsni nu nhne be nookwu, o kanu nye risi oro ogbako ele Ju wam, "I tuko ogwnu, kweru kpoi."

37 O kwéle nye obula snornu a zne, okwolem Pita, nu Jemisi nu Joni nwene Jemisi.

³⁸ Nga be vaduru n'oro nye risi oro ogbako ele Ju wam, o whnuru mkpakpo, nu agida ele naakwina ekwina, neesi okokoba.

³⁹ Nga o bnazneru, o sikwa be “Ndaa nhne anu naakpakponu, naakwina? Nnwọ rinya ka nwuna onwu, kovu o zi n'anyarna.”

⁴⁰ Be mu a rumu. Nga o chihalaru kpakara be, o kwuru nda watakiri wam nu nne a nu ele nu ya sno bna nu hne watakiri wam dnanyi.

⁴¹ O nwugwuru watakiri wam n'aka, kanu a, “Talita kumi,” ke bu, “Nnwọ rinya mati, m ka m ji, lizo.”

⁴² Ngangam, nnwọ rinya mati wam lizo, neezne izne (o gbaru nri nu awha lawuru). O duru be ehni k'agida.

⁴³ Jizosi do be aka nu nsni o ziko nye mahia nhne mernu. O kaa masi be nyee a nhne o ri.

6

Be juru Jizosi nu Nazareti

(Mat 13:53-58; Luk 4:15-30)

¹ Jizosi hi hnam whoga, va n'eli a, ele sno apna a snornu a.

² O du n'Obochi Ozukwa Inwe, o panizo o zni nhne n'oro ogbako ele Ju. Nga be nuru nhne o neezni, o duru be ehni, be neesikwa, “Ndaa hne nwerukna ka nwehjaru kpakara nhne ka? Kini bu akoniche ke be nyernu a. Ndaa kpa o ji noronu kpakara ernu ndu-ehni ka?”

³ Ka o buo nye okwa-nka wam, nnwọ Meri, nu nwene Jemisi nu Josefu, nu Judasi, nu Saimoni? O buo rumu nne a rinya zi n'esilawuru ai hna?” Be we ovu ehni megidne a.

4 Jizọsi kanụ be, “Okwolem nụ ẹli ke a nụ ezi-nụ-oro a, ma nụ esilawuru ele ke a, bụ hne nye ọwhnurninya nwée ọsobisinu.”

5 Ọ rnúlige ẹrnu ndu-ẹhni n'ẹli kị, okwolem nụ o bikwasiri ele nrịria ele nụ ele aka, me ẹhni siri be rikne.

6 Ókwe ekwe be duru a ẹhni.

*Jizọsi zihalaru ele izi a
nri nụ ẹbo*

(Mat 10:5-15; Luk 9:1-5)

Jizọsi zne nụ rime ẹli-ọhna zị ichne ichne zị be ndundu, neezni nhne.

7 O sukwu ele izi nri nụ ẹbo wam, panizo neezihala be ẹbo ẹbo, nyee masị be rikne nụ hne rẹnwu ojo zị.

8 O nyee be iwu be jíkọ nhne ọbula n'izne be, okwolem mkpara, be jíkọ nhne oriri, mọbu rẹkpa, mọbu ịwai nụ rẹkpa iwo be.

9 Ọ karụ be woru okoro-ọchi, be wóko iwo lawuru.

10 Ọ kanụ be, “Anụ dazigidne n'oro ọbula anụ jaabna, tem anụ whọga n'ẹli wam.

11 Hne ọbula be nábnanyana anụ mọbu bnóne nsni n'ikwu-ọnu anụ, anụ jọowhoga pịi, lịsnama rịzna ke zị n'ọchi anụ, ma ọ bụru nhne akebne megidne be.”

12 Be whọga nookwunu ele badnụ ikwu-ọnu Chiokike, be tųhnasna mkpọma.

13 Be chíhalaru agịda rẹnwu ojo, tesi masị agịda ele naariya ariya mọno, me ẹhni siri be rikne.

*Ẹnwu Jọni Nye Wụ Mini
(Mat 14:1-12; Luk 9:7-9)*

14 Eze Erødu nurnu a, kwnornu nu røwhna Jizøsi whølam iwhne. Agwna badnu naakaa nu Jøni Nye Wu Mini hilem n'enwu lizo, ø bu nhne mernu kpakara rikne ka ji nõornu ernu ndu-ehni nu rime a.

15 Ele berere karu, "Ø bu Elaija."

Ele berere kaa, "Ø bu nye øwhnurninya, lele otu nu rime ele øwhnurninya gbaka."

16 Kovu Erødu nurnu a, ø kaa, "Ø bu Jøni Nye Wu Mini, nye me biri risi, o lizølam."

17 Erødu karu nu mbøm be nwudne Jøni, kne a eriri n'oro ikelu kwnornu nu Erodiasi nnwerne Filipu nwene a, nye ø luru.

18 Jøni kannu Erødu, "Ø buo øma n'iwu ølu nnwerne nwene i."

19 Erodiasi beteru o vunu Jøni irno nu mkpøma, o pioru o gbu a, kovu nu o nwée rikne,

20 kwnornu nu Erødu turu øgwnu Jøni. Ø mahjaru nu ø bu nye mee mma nu nye zi nsø, ø bikwata a nkari. Ige øbula ø nurnu ikwu-ønu a, øriri jihia mkpøma, kovu nu o ji snarnima nurnu ikwu-ønu a.

21 N'ipne-aznu, oghere whuyanu Erodiasi. Erødu siri wiri o chenwanya ømumu a. O sukwu ele nu ya sno neechi, nu ele risi øgwnu nu ele risi eli Galili.

22 Nga nnwø rinya Erodiasi bnanyarnu tne eri søru Erødu nu ele nu ya zi n'ønu k'agida, eze kanu woknornokno wam, "Rio m nhne øbula masiri i, m jeenye i."

23 O kweru a mkwna kwesi a rikne, kaa, "Nhne øbula i rioru m, m jeenye i, ø bubedi o keme eli-eze m øbo."

24 Ø whøga sika nne a, "Kini bu nhne me jøorio?"

Ọ kanu a, “Risi Joni Nye Wu Mini.”

²⁵ Nnwọ rinya wam gba ẹso kwnusi eze, kanu a, “M choru m i nyee m risi Joni Nye Wu Mini n'agbugba kitna.”

²⁶ Ehnı nwurınu eze, kovu kwnornu mkwna wam o kweru nu ele ya nu be dazi neeri wiri, o masila a o la aznu nu mkwna o kweru a.

²⁷ Ngangam, o zihala nye gbu badnu, nyee a iwu o bihia risi Joni. O zne bihia risi Joni n'oro ikelu.

²⁸ O vuya risi a n'agbugba, nyee a nnwọ rinya wam, nnwọ rinya wam nyee a nne a.

²⁹ Nga ele sno apna Joni nurınu a, be va vuru iznu a lite.

*Jizosi nyernu pokwu
badnu isne wiri*

(Mat 14:13-21; Luk 9:10-17; Jon 6:1-14)

³⁰ Ele izi Jizosi hiebnanyarnu hne Jizosi zi, be tnisinu a kpakara nhne be mernu nu kpakara nhne be znirni ele badnu.

³¹ Kwnornu nu agida ele badnu naava, naala, oghere o ri wiri zila, Jizosi kanu be, “Anu va ichne nu hne koru owu, zukwaru inwe.”

³² Be nu nsnunu be bna n'ogbo zne hne koru owu.

³³ Agida badnu whuru nu nga be neezne. Be mahıaru be, be hi nu kpakara eli-ohna gweru ochi gbako nu pii, beru be osno du.

³⁴ Nga Jizosi whıyaru n'ogbo, o whnu igbudu ele badnu, o donu be obirizi, kwnornu nu be nu lele aturu nu nwée nye noznu be. O panizo neezni agida nhne.

³⁵ Nga obochi znemirnu, ele sno apna a vakwnusi a, kaa, “Hna kogwu owu, obochi zneminem.

³⁶ Zihala ele ka ma be zne nū rime ẹkwu ma nū rime ẹli-ọhna zne zūru nhne oriri.”

³⁷ Kọvu Jizọsi kanū be, “Anū nyee be nhne be jeeri.”

Be sịkwa a, “A jeezne zūya brẹdi riwhu mkpūru iwai lawūru, nyega be, ma be ri?”

³⁸ O sịkwa be, “Anū nwernu ike brẹdi ele? Zne lekasi.”

Nga be mahiāru, be kaa, “Ike brẹdi isne, nū aznū lawūru.”

³⁹ Jizọsi kanū be mee kpakara be daziri ẹli nū mkpūru nū mkpūru n'olu achara bụdnū.

⁴⁰ Be daziri ẹli nū mkpūru nū mkpūru, ele otu riwhu nū ele nri isne.

⁴¹ Jizọsi gweru ike brẹdi isne wam nū aznū lawūru wam, le anya n'oligwe, tū mmamma, nyawama ike brẹdi isne wam, nyee ele sno apna a ma be nyee ele wam. O keme aznū lawūru wam n'esilawūru kpakara be.

⁴² Kpakara be ri, riji rụwho.

⁴³ Ele sno apna a tūtukota rụvnuruvnu brẹdi nū aznū ke gwnarnū ke jihiaru nri nū nkita lawūru.

⁴⁴ Ele riri brẹdi wam bụ pokwu ele rukna isne.

*Jizọsi znernu izne
n'olu mini
(Mat 14:22-33; Jọn 6:15-21)*

⁴⁵ Ngangam o mee ele sno apna a bna n'ogbo, beru a ọsno kwọwhe aznū osimini dū ẹli Bẹtesaida, nga o neezila igbudu badnū wam.

⁴⁶ Nga o zilakworu be, o zne n'olu rugwu zne kpe okpukpe.

⁴⁷ N'ogbednachi, ọgbo wam zị n'esilawūru okne osimini, ya nū nsnūnu a zị n'olu ẹli.

48 O whnu be hne be zi n̄odoli n̄okwo oḡbo kwnornu n̄u ruwhere neewhegidne be. O vakwnusi be n̄u onu osisi neezne izne n'olu mini. O pio o whe be,

49 kovu nga be whnurnu a hne o neezne izne n'olu osimini, o n̄u be lele renwu. Be si okokoba k'agida.

50 Kpa kpakara be whnurnu a, mkpoma la be mini.

O kanu be, “Mkpoma si anu rikne, o bu mawa. Anu tuko ogwnu.”

51 O pnekwnusi be n̄u rime oḡbo, ruwhere wam whebiri. O duru kpakara be ehni k'agida.

52 Be ghoyage ernu ndu-ehni gbasiri ike bredi isne wam, mkpoma be ghoyagele a.

Jizosi gworu ele nr̄ia
n'eli Genezareti

(Mat 14:34-36)

53 Nga be wheru, be vadu n'eli Genezareti kpokwnusi oḡbo be.

54 Kpa be whuyaru n'ogbo, ngangam agida ele badnu mahiaru Jizosi.

55 Be gbazu kpakara eli wam, panizo noovuya n'okpata ele nr̄ia penupe obula be nurnu o zi.

56 Hne nu hne obula o bnazneru, n'eli mati, m̄obu eli hna ezi, m̄obu n'ekwu, be dnanyita ele nr̄ia n'ahia, be naariasno a ma be kpatu ke bu onu iwo aka. O gworu kpakara ele kpaturu onu iwo a aka.

7

Omen'eli ke ele mbom
(Mat 15:1-9)

1 Nga ele Farisi nụ agwna ele zni iwu ele Ju hiri nụ Jeruselem vakwnusi Jizọsi,

2 be whnurnu nụ ele sno apna a ji aka kpuru rune neeri wiri, ke bụ aka be kwóla ọkwọ.

3 Ele Farisi nụ kpakara ele Ju rí wiri hne be kwóla aka nkari. Be naabita omen'eli ke ele mbom znirni be.

4 Be hi ahia yahna, be rí nhne obula hne be hniage ehni. O zi masi omen'eli berere ke be nahiaru, noosno, lele kpa be snu okiko, nụ ite, nụ ọkwu.

5 Ele Farisi nụ ele zni iwu ele Ju sika Jizọsi, “Kini kpayaru ele sno apna i za naabita omen'eli ele mbom? Be gweru aka be kwokwala nkari neeri wiri.”

6 Jizọsi saru be, “Azaya whnurnu owhnurninya gbasiri anu k'ezi, naakaa, anu bu ele ruwhnu lawuru, lele kpa be gbaru a n'okwukwo nso, naakaa, 'Ele ka ji mgbele-onu etekne nosobisinu m, kovu mkpoma be zi ikere nu hne me zi.

7 Be nokponu m risi eli n'etekne, neezni nhne badnu nyernu n'iwu lele nu o bu iwu ke Chiokike.’

8 Anu naagharu iwu ke Chiokike, nwukwaru omen'eli ke badnu.”

9 Jizọsi kanu be, “Anu marnu ama gharu nhne Chiokike nyernu n'iwu ma anu bita omen'eli anu.

10 Kwnornu nu Mozizi karu, ‘Sobisinu nda i nu nne i,’ nu ‘Nye obula ke jovu nda a mabu nne a onu, be gbu a.’

11 Kovu anu karu nye obula ke jaakanu nda a mabu nne a, ‘Nhne i jeerihia n'aka m bu Kobani’ (ke bu nkesi o nyernu Chiokike)

¹² ige wam anụ jéekwe o menu nda a mọbu nne a nhne berere.

¹³ Anụ neeme nhne ka neegweru ikwu-ọnu Chiokike neeme nhne etekne hite n'omen'eli ke anụ, neenyewhete a n'aka ele berere. Nụ agida nhne nụ kpa anụ neeme.”

Nhne neemeru badnụ
(Mat 15:10-20)

¹⁴ Jizọsi sukwuru igbudu badnụ wam berere kanụ be, “Anụ bnote nsni n'ikwu-ọnu m, anụ ghohia a masi.

¹⁵ Ọ zá nhne ke hi n'ederezi bna nụ rime badnụ ke nwernu rikne meru a. Kọvu nhne ke hiri nụ rime badnụ whụya bụ nhne neemeru badnụ.” [

¹⁶ Nye nwernu nsni o ji ọ nụ nhne ọ nurnu.]

¹⁷ Nga ọ gharuru agida ele badnụ wam bna nụ rime ọro, ele sno apna a sịkwaru a ajiji gbasiri elulu wam.

¹⁸ Ọ saru be, “Ke bụ nụ anụ nwée ọghohia? Anụ máa nụ nhne ke hiri n'ederezi bna nụ rime badnụ nwée rikne meru a?

¹⁹ Kwnornu nụ ọ bnána nụ rime mkpọma a, hne ọ bnarnụ bụ ruwho a, be nynohala a n'osoro.” (Ka bụ ke Jizọsi jiri kaa nụ kpakara wiri zị rịchna.)

²⁰ Jizọsi zị koriri nookwu, “Nhne ke hiri nụ rime badnụ whụya bụ nhne neemeru badnụ.

²¹ Kwnornu nụ ọ bụ nụ rime mkpọma badnụ bụ hne kpakara ọriri ọjo hi nọowhuya, ome ọyi, oznu buznu, ogbu badnụ,

²² ome ọyi ele nwernu nnwerne nụ ele nwernu nzi, anyakwu, aruru-eli, aghigho, ọgba ewhere, ọwho-anya, ọkaja, oknomokno, iwhnirniwhno,

²³ Kpakara nhne ojo ka hi nụ rime badnụ whụya, be meru badnụ.”

*Okwnata ovu otu
nwerinya Sirofinisa
(Mat 15:21-28)*

²⁴ Jizọsi hi nụ rime pịi whọga, zne n'ẹli zị Taya ndundu. O bna n'otu ọro, ọ píoie ele badnụ mahịa, kọvu nụ be nwée rikne bigwa a.

²⁵ Ngangam, otu nyerinya ke nnwọ a rinya matị nwernu ẹnwu ojo nurnu nhne gbasiri Jizọsi, o varu dna n'ẹli n'ochi a.

²⁶ Nwerinya wam búo nye Ju, be murnu a nụ Sirofinisa. O riasno a ma ọ chihala ẹnwu ojo wam n'ehni nnwọ a rinya.

²⁷ Jizọsi kanu a, “Beru ọsno nyejite rumu takiri wiri ruwho, kwnornu nụ ọ búo ọma o gweru wiri rumu takiri tūhalanu nkita.”

²⁸ Kọvu ọ saru, “Nyenwe aị, ọ bụbedi rumu nkita ke zị nụ mkpururu ikpechi neeri ruvnuruvnu wiri rumu takiri.”

²⁹ Jizọsi kanu a, “Kwnornu nụ nhne ka i kwuru, la, ẹnwu ojo wam whọgalam n'ehni nnwọ rinya.”

³⁰ O la n'oro a, whnu nụ nnwọ a dnanyi n'olu ọkpata, nụ ẹnwu ojo wam whọgalam masi.

*Jizọsi gwọru nye mgbu
nụ nsị inyo*

³¹ Jizọsi whọgaru nụ ngeri Taya gawhe n'esilawuru Saịdoni, hi n'esilawuru ẹli Dekapolisi du Osimini Galili.

³² Be kwuyanụ a otu nyenum ke dnarnu mgbu ke nụ nsị, be riasno a ma o bikwasị a aka a.

³³ Jizọsi kwuhala a n'esilawuru agịda badnu whọga ichne, ọ yisi mkpaka a nụ nsni a lawuru, gbu ọnu-mini, kpatu riro a aka.

³⁴ O lelizo anya n'oligwe, snu idne, kaa, “Ēfata,” ke risi a bu, “Kpume.”

³⁵ Ngangam nsni a lawuru kpumernu, nhne knesnirni a riro tomarnu, o kwukwata oka.

³⁶ Jizọsi kasinu be rikne be kanukwadia nye obula, kovu kpa ọ naakanusinu be rikne bu kpa be nee-wheke a.

³⁷ O duru kpa be hna ehni k'agida, be naakaa, “O neeme kpakara nhne buru oma. O mernu ele nsni inyo nu nsni, ele mgbu kwu oka.”

8

Jizọsi nyernu pokwu badnu eno wiri (Mat 15:32-39)

¹ N'ige wam nga agida ele badnu gbakoru berere, be nwée masi nhne be jeeri. Jizọsi sukwu ele sno apna a, kanu be,

² “M nodonu agida ele badnu ka obirizi, kwnornu nu me nu be dazilam obochi eto, be nwée nhne be jeeri.

³ Ọ buru nu me zihala be n'onu etekne, anya-aju joovu be n'apna, agwna be hi hne zi ikere va.”

⁴ Ele sno apna a sika a, “Ndaa kpa badnu jeeji nyeji ele badnu ka wiri ruwho n'eli-ikpa hna?”

⁵ Ọ sika be, “Anu nwernu ike bredi ele?”
Be kaa, “Esau.”

⁶ Ọ kanu agida ele badnu wam daziri eli. O gweru ike bredi esau wam, tunu Chiokike mmamma, ọ nyawama be, nyee ele sno apna a be bete neenye

ele badnu, ele sno apna a kesiri ele badnu wam wiri.

⁷ Be nwemasiri aznu matı ele nu ele, o tu kwno mmamma, kaa be nyee ele wam.

⁸ Be ri, ruwho ji be, be tutukota runuruvnu bredi ke gwnarnu, ekperi nkita esau jiharuru.

⁹ Be duru pokwu eno, Jizosi zihala be.

¹⁰ Jizosi bna nu rime ogbo, ya nu ele sno apna a, be va nu eli Dalamanuta.

*Ele Farisi pioru
nhne elekema
(Mat 16:1-4)*

¹¹ Ele Farisi varu panizo nesikwa a ajji, noopio nhne elekema hi n'oligwe, naakpa a iru.

¹² O snu idne k'agida nu rime ovu a, kaa, "Kini kpahiaru ebiri ka noopio nhne elekema? N'ezi me kanu anu, o za nhne elekema be jeenye ebiri ka."

¹³ O gharu be bna kwno nu rime ogbo whe aznu osimini kiyari.

*Nhne whu bredi
ele Farisi nu Erudu
(Mat 16:5-12)*

¹⁴ Ele sno apna a chezuru o gweru bredi, be ji otu ike bredi kpoi nu rime ogbo.

¹⁵ Jizosi kasinu be rikne, "Anyu du anu eli, anu neeze nhne whu bredi ke ele Farisi nu Erudu."

¹⁶ Be notnurita n'esilawuru be, naakaa, "O bu kwnornu nu a jile bredi."

¹⁷ Nga Jizosi mahiaru a, o kanu be, "Kini kpahiaru anu naakaa nu anu jile bredi? Anu yoghoyage? Nduu otula anu sa?"

18 Anu nwernu anya, anu whnú ọsno? Anu nwernu nsni, anu nú nhne? Anu gbádiyala?

19 Nga me keru ike brẹdi isne n'esilawuru pokwu badnu isne, nkita ele jihiaru nu ruvnuruvnu anu vulizoru?"

Be kaa, "Nri nu ẹbo."

20 "Nga me keru ẹsau nye pokwu badnu ẹno, ruvnuruvnu nkita ele bu nhne anu vulizoru?"

Be kaa, "Ẹsau."

21 O kanu be, "O bu nu anu yóoghohiala koriri?"

Jizosi gwọru nye isni nu Bẹtesaida

22 Jizosi nu ele sno apna a va n'eli Bẹtesaida. Be kwuyanu a otu nye isni, riasno a ma o kpatu a aka.

23 O nwugwuru nye isni wam n'aka, duru a zne n'aznu eli-ohna wam. O gbusi a onu mini n'anya, tukwasi a aka a lawuru, o sika, "O zi nhne i noowhnu?"

24 O le anya n'olu, kaa, "M noowhnu badnu, kovu be nu lele isisi neezne izne."

25 Jizosi tukwasi kwno a aka a lawuru n'anya a berere, o legidne anya, anya a buru oma, o whnusnama kpakara nhne nkari.

26 O zihala a n'oro a, kanu a, "I lahnakwadia nu rime eli-ohna berere."

Pita kahiaru nye Jizosi bu (Mat 16:13-20; Luk 9:18-21)

27 Jizosi whoga, ya nu ele sno apna a bna nu kpakara eli-ohna mati zi ndundu Sizaria Filipai. Nga be zi n'apna, o sika ele sno apna a, "Ele badnu be naakaa nu me bu nyele?"

28 Be saru a, “Agwna be naakaa Joni Nye Wu Mini, ele ke berere naakaa Elaija, ele ke berere kaa otu nu rime ele owhnurninya.”

29 O sikwa, “Anu n'iwhuru anu, anu kanu nu m bu m nyele?”

Pita saru a, “Ji n'iwhuru i bu Karaısi wam.”

30 O do be aka nu nsni, kaa, “O za nye anu kanu nhne gbasiri m.”

*Jizosi kwuru oka
gbasiri enwu a*

(Mat 16:21-28; Luk 9:22-27)

31 Jizosi panizo neezni be nhne, naakaa, “Nnwọ ke Badnu jaatariri agida awhnwhnu, ele okno badnu nu ele risi ariohna nu ele zni iwu ele Ju jọju a, be gbu a, nga obochi eto whemernu, o jeehi n'enwu lizo.”

32 O kwuru ka kpa nye obula joghohia. Pita kwuhala a, naabnanu a.

33 Nga o tuhnaasnarnu whnu ele sno apna a, o bigbo Pita, kanu a, “Zne n'aznu m, Setani, kwnornu nu i neeche echiche lele badnu, o buo lele Chiokike.”

34 O sukwu igbudu badnu wam nu ele sno apna a, o kanu be, “O buru nu nye obula joosno m n'aznu, o jọju ehni a, vuru ogba a sno m.

35 Nye obula ke noopio o dohia budnu a jootuwu a, kovu nye obula ke jootuwu budnu a kwnornu m nu izi oma, o joznohia a.

36 Mbnarna kini bu nhne badnu jeenwe o buru nu o rihia kpakara owa n'iru tuwhume budnu a?

37 Kini bu nhne badnu jeeji gbanwo budnu a?

³⁸ Nye ọbula ke iwhnerne m nụ ikwu-ọnu m jọotu n'ebiri ewhere nụ aruru-eli ka, iwhnerne nye wam jọotu Nnwọ ke Badnụ nga ọ jaava n'igwugwu ke Nda a, ya nụ ele enine izi a zị nsọ.”

9

¹ Jizọsi kanụ be, “Me kanụ anụ ezi ọka, agwna ele gwuzo hna jọonwu ẹnwu tem be whnụ ẹli-eze Chiokike hne o ji iknerna va.”

Onwoghari Jizọsi (Mat 17:1-13; Luk 9:28-36)

² Nga ọbochi isunu whemernu, Jizọsi kwuru Pita, nụ Jemisi, nụ Jọni duru be pnezne n'olu rugwu zị olu whọga ichne. O nwoghari nụ ruwhnu be.

³ Iwo a noonwu va-a-a ke ọ zá nye zị n'ọwa ka jọosnuli iwo ki.

⁴ Be whnurnu Ẹlaija nụ Mozizi, be nụ Jizọsi nook-wurita ọka.

⁵ Pita kanụ Jizọsi, “Nda-ai-kwu, ọ bụru oma a daziri hna, ngwa ma a wu ọro-eka ẹto, otu bụru ke i, otu ke Mozizi, otu ke Ẹlaija.”

⁶ Ogwnu tūru be ke kpayarụ ọ máa nhne o nookwu.

⁷ Erumeru oligwe varụ kpusni be, akpiri hiri nụ erumeru oligwe wam whuya, kaa, “Ka bụ Nnwọ m me whnurnu n'anya, anụ bnotenu a nsni.”

⁸ Kpurugadnam, nga be leru anya gburugburu, ọ zá nye be whnurnu, okwolem Jizọsi kpọi.

⁹ Nga be hiri n'olu rugwu wam hiehna, ọ kasinu be rikne, be kánụ nye ọbula nhne be whnurnu, tem Nnwọ ke Badnụ hi n'ẹnwu lizọ.

¹⁰ Be ọbịta nhne ka nụ mkpọma be. Be nẹsikwa n'esilawuru ẹhni be, “Kini bụ risi olizọ n'ẹnwu?”

11 Be sịkwa a, “Kini kpayarụ ele zni iwu ele Ju jiri kaa nụ Ẹlaija jeebe ọsno va?”

12 Jizọsi sarụ be, “Ọ bụ n'ezi nụ Ẹlaija jeebe ọsno va, bıkwata kpakara nhne lele kpa ọ zị nụ mbom. Kini mernu be gbarụ a n'okwukwo nsọ gbasiri Nnwọ ke Badnụ, nụ ọ jaata agịda awhnụwhnu, be jụ masị a?”

13 Kọvu me kanụ anụ nụ Ẹlaija valeṃ, be mee a kpa o jiri masị be, lele kpa be gbarụ a n'okwukwo nsọ gbasiri a,”

*Jizọsi gwọru nnwọ rukna
(Mat 17:14-21; Luk 9:37-43a)*

14 Nga Jizọsi nụ badnụ ẹto ele sno apna a vakwnusiri ele sno apna a ele berere, be whnụnu igbudu badnụ gbarụ be gburugburu, whnụ masị ele zni iwu ele Ju hne be nọdogbuta.

15 Ngangam o du kpa be hna ẹhni k'agịda nga be whnụnu a, be gbazne, bekwu a.

16 Jizọsi sịkwa ele sno apna a, “Kini bụ nhne anụ nụ be nọdogbuta?”

17 Otu nyenum nụ rime igbudu badnụ wam sarụ a, “Nye-zni-nhne, m kwuyannu m jị nnwọ m rukna ke nwernu rẹnwu dnarnụ mgbu.

18 Penupe ọbula ọ nwụgwuru a, o vudna a n'ẹli, ọ nọogbo okoto n'ọnu, naata rụkwnurnu-ize, rọknete ẹhni. M kanụ ele sno apna ị ma be chihala a, kọvu nụ be nwée rikne.”

19 Jizọsi sarụ be, “Anụ ebiri ke nwée ọkwnata mkpoma, me nụ anụ jaadazị dụ ngele? Me jeesinu anụ ovu dụ ngele? Anụ kwuyanụ m nnwọ wam hna.”

20 Be kwuyanụ a nnwọ rukna wam. Nga rẹnwu ojo wam whnurnu Jizọsi, ngangam, ọ dọsi nnwọ rukna wam rikne. Ọ dna n'ẹli nọotnurni a, ọ nọogbo okoto n'ọnu.

21 Jizọsi sịkwa nda a, “Ndaa nga nhne ka beteru eme a?”

Ọ kaa, “Hite nga ọ bu nnwọ matị.

22 Agịda ige, ọ dọbnarnu a nụ rime bẹkwunu ma nụ rime mini ma o gbu a. Ọ bụru nụ o nwernu nhne i jeemeli, dọnu aị obirizi, yisinu aị aka.”

23 Jizọsi kanụ a, “Ị naakaa, ọ bụru nụ o nwernu nhne me jeemeli? Kpakara nhne jeemelinu nye nwernu ọkwnata ovu.”

24 Ngangam, nda nnwọ watakiri wam siwama, “M kweru m, yisinu ókwe ekwe m aka.”

25 Nga Jizọsi whnurnu nụ agịda badnụ naagbaya, o bigbọ rẹnwu ojo wam kaa, “Ji rẹnwu ke dnarnụ mgbu nụ nsni inyo, m neenye i iwu, hi nụ rime a whụya, i bnáma nụ rime a berere.”

26 Rẹnwu ojo wam si okokoba, dọsi a rikne, hi nụ rime a whụya. Nnwọ wam dna lele nye nwurnu ọnwu, ke kpayarụ agịda badnụ jiri kaa, “Ọ nwunam we.”

27 Kọvu Jizọsi nwụgwuru a n'aka dọlizo a, o lizo.

28 Nga Jizọsi bnanyarnụ n'oro, ele sno apna a sịkwa a ichne, “Kini kpayarụ a nwéne rikne chihala rẹnwu ojo wam.”

29 Ọ kanụ be, “Rẹnwu nụ lele ka jọowhoga nụ nhne ọbula, okwolem n'okpukpe.”*

* 9:29 Agwna ọkwukwo kwuru: *hite n'okpukpe nụ ovu ọnu.*

*Jizɔsi kwukwnornu ɔka
gbasiri ɛnwu a*

(Mat 17:22,23; Luk 9:43b-45)

³⁰ Be hi nu ɛi whuya gawhe n'esilawuru Galili. O kwéle nye ɔbula mahia hne be zi,

³¹ kwnornu nu o neezni ele sno apna a nhne, naakaa, “Be jeegweru Nnwɔ ke Badnu resi n'aka ele badnu, be joogbu a, nga ɔbochi ɛto whemernu, o jeeji n'ɛnwu lizɔ.”

³² Kɔvu nu be ghɔhiala ɔka wam, ogwnu kwéle be sɔkwa a nhne gbasiri a.

Nyele kakwo ibne a?

(Mat 18:1-5; Luk 9:46-48)

³³ Be vadu Kapanom, nga Jizɔsi bnarnu n'oro, ɔ sɔkwa be, “Kini bu nhne anu nookwu n'apna?”

³⁴ Kɔvu be mesnirni ɔnu be, kwnornu nu be nɔdogbuta n'apna nye kakwo ibne a n'esilawuru be.

³⁵ Jizɔsi daziri ɛli sukwu ele sno apna a nri nu ɛbo wam. O kanu be, “O buru nu nye ɔbula noopio ɔ bu nye risi, ɔ jɔobu nye ipne-aznu, nu nye neeznenu kpakara ele badnu izi.”

³⁶ O kwuru otu watakiri gwuzote a n'esilawuru be, o jiri a n'aka a, kanu be,

³⁷ “Nye ɔbula ke jaanarnu otu nu rime watakiri ka nu rewhna m, nanarnu m, nye ɔbula ke jaanarnu m k'ezi, ɔ buo me bu nye ɔ nanarnu k'ezi, ɔ bu nye ziyaru m.”

*Nye zá neemegidne ai
dagwunu ai*

(Luk 9:49,50)

³⁸ Jọni kanụ a, “Nye-zni-nhne, a whnụrnu otu badnụ hne ọ naachihala rẹnwu ọjọ nụ rẹwhna ị, a bnosni a, kwnornu nụ ọ zá noosno aị.”

³⁹ Jizọsi kaa, “Anụ bnósni a, kwnornu nụ ọ zá nye jọornu ẹrnu ndu-ẹhni nụ rẹwhna m, ke jaakaa m ọka ọjọ ngwa ngwa.

⁴⁰ Nye zá neemegidne aị dagwụnu aị.

⁴¹ M naakanụ anụ ezi ọka, nye ọbula ke jookwute anụ otu okiko mini anụ nwọ kwnornu nụ anụ bụ ele Karaisi jaanahiariri ọgwo ẹrnu a.”

*Nhne jeeme badnụ mehie
(Mat 18:6-9; Luk 17:1,2)*

⁴² “Nye ọbula ke jeeme otu nụ rime ele matị ka mehie, bụ ele kweru nụ me, ọ jaakanụ a mma nụ be gweru okne rugwu ogwe-wiri nyasi a n'ili, migbu a n'okne osimini.”

⁴³ Ọ bụru nụ aka ị jeeme i, i mee mmehie, gbubime a, ọ jaakanụ ị mma ọ bna nụ bụdnu kwó okwo vuru ọru karụ o nwernu aka ị lawuru bna nụ bẹkwnu ẹli rẹnwu chnị echni. [

⁴⁴ Kị bụ hne rukpurukpuru be nwụ ọnwu, bẹkwnu be chnị echni.]

⁴⁵ Ọ bụru masị nụ ọchi i jeeme i, i mee mmehie, gbubime a, ọ jaakanụ ị mma ọ bna nụ bụdnu kwó okwo nụ mgworo karụ o nwernu ọchi lawuru ị, be tubna i nụ bẹkwnu ẹli rẹnwu. [

⁴⁶ Kị bụ hne rukpurukpuru be nwụ ọnwu, bẹkwnu be chnị echni.]

⁴⁷ Ọ bụru masị nụ anya ị jeeme i, i mee mmehie, gwupu a, ọ jaakanụ ị mma ọ bna n'ẹli-eze Chiokike nwernu otu anya karụ o nwernu anya lawuru be tubna ị nụ bẹkwnu ẹli rẹnwu.

48 Kì bụ hne rukpurukpuru be nwú ọnwu, bẹkwnu be chnì echni.

49 “Lele kpa a jì arụa mee wiri sọ n'ọnu, ọ bụ kpa Chiokike neeji bẹkwnu awnụwhnu mee ele ke a bụru ele agwa ọma.

50 “Arụa bụru ọma, kọvu arụa tuwhu ọso n'ọnu a, be jeeji kịni mee a ọ sọ n'ọnu? Anụ nwernu arụa nụ rime anụ ma anụ nụ ibne anụ ziri n'udno.”

10

Ọgba nnam

(Mat 19:1-12; Luk 16:18)

1 Jizọsi whọga zne n'ike ẹli Judiya n'aznụ Osimini Jodani kiyari, agịda ele badnụ jipiya kwno hne ọ zị. Lele kpa o mesi, o neezni be nhne.

2 Agwna ele Farisi vakwnusi a, sịkwa a, “Ọ bụru ọma n'iwu nyerukna gba nnwerne a nnam?” Be naakpa a iru.

3 Ọ sịkwa be, “Kini bụ nhne Mozizi nyernu anụ n'iwu?”

4 Be kaa, “Mozizi kweruru nyerukna gba ọkwukwo nnam nyee nnwerne a, chihala a.”

5 Jizọsi kanụ be, “Kwnornu nụ mkpọma ọjo anụ kpayarụ Mozizi gbarụ iwu ka n'ọkwukwo.

6 Kọvu hite n'ọpanizo okike ọwa, Chiokike kpuru be nyerukna nụ nyerinya.

7 Kwnornu nụ ka, nyerukna jaagharụ nda a nụ nne a, takwnụsi n'ẹhni nnwerne a,

8 be lawuru jọogho otu anọ-ẹhni. Be búma badnụ lawuru, kọvu otu anọ-ẹhni.

9 Nhne Chiokike knekọtaru, badnụ tọmana a.”

10 Nga be bnarnụ nụ rime ọro, ele sno apna a sịkwa a ajiji gbasiri ọka ka berere.

11 Ọ kanu be, “Nye obula ke jaagba nnwerne a nnam lu nnwerne berere, neemegidne a oyi.

12 Ọ buru masi nu nnwerne gba nzi a nnam, gbọru nzi berere, o neeme masi oyi.”

Jizosi goziri rumu takiri
(*Mat 19:13-15; Luk 18:15-17*)

13 Ele badnu nookwuyanu Jizosi rumu takiri ma o kpatu be aka, kovu ele sno apna a bigbọru ele kwuyaru be.

14 Nga Jizosi whnuru a, o we ehi k'agida, o kanu be, “Anu gharu rumu takiri ma be vakwnusi m, anu bnosi be, kwnornu nu eli-eze Chiokike bu ke ele nu kpa.

15 Me kanu anu ezi oka, nye obula ke jeegeru eli-eze Chiokike lele nnwo mati, o jaba na nu rime a ria ria.”

16 O kwuru be n'aka a lawuru, tukwasi be aka a, gozi be.

Otu nye ochichi
(*Mat 19:16-30; Luk 18:18-30*)

17 Nga Jizosi whogaru n'apna, otu nyenum gbakwnusi a, gbunu a mpnerne ochi, sika a, “Omamarna Nye-zni-nhne, kini bu nhne me jeeme ma m kehia m budnu kwó okwo?”

18 Jizosi saru a, “Kini kpayaru i noosukwu m nye oma? O za nye bu nye oma, okwolem otu badnu, bu Chiokike kpoi.

19 I maam kpakara nhne be nyernu n'iwu, i gbuko badnu, i meko oyi, i znuko buznu, i gbako akebe aghalaghala, i megbuko badnu, sobisinu nda i nu nne i.”

²⁰ Ọ kanụ a, “Nye-zni-nhne, kpakara nhne ka bu nhne me bítaru hite n'ikoro m.”

²¹ Jizọsi leri a anya oma, kanụ a, “Otu nhne gwnarnu i jeeme, la, re kpakara nhne i nwernu, kesi ele mboni, i jeenwe ekwnu n'oligwe, vaa, sno m.”

²² Ruwhnu gbaruru a n'oka wam, o la, naagbaru ruwhnu, kwnornu nu o nwernu ekwnu k'agida.

²³ Jizọsi leri anya gburugburu, kanụ ele sno apna a, “Le kpa o jiri ra ehni ele nwernu ekwnu o bna n'eli-eze Chiokike!”

²⁴ Oka wam du ele sno apna a ehni, kovu nu Jizọsi ka masinu be, “Rumu m, le kpa o jiri ra ehni o bna n'eli-eze Chiokike.

²⁵ O zinu anohia kameli ewheke o gawhe n'anya alanga karu ele nwernu ekwnu o bna n'eli-eze Chiokike!”

²⁶ O du kpakara ele sno apna a ehni k'agida, be sikwarita ehni be, “Ndakwanu nye be joznohia?”

²⁷ Jizọsi leri be anya kaa, “Hne badnu zi be jemeli a, kovu o buo hne Chiokike zi. Be meli kpakara nhne hne Chiokike zi.”

²⁸ Pita panizo naakanu a, “Le, a sigbasiri kpakara nhne a nwernu, snornu i.”

²⁹ Jizọsi kanu, “Me kanu anu ezi oka, o za nye obula ke sigbasiri oro, mobu rumu nwene rukna, mobu rumu nwene rinya, mobu nne, mobu nda, mobu rumu, mobu ekwu kwnornu m nu izi oma,

³⁰ ke janaanha karu riwhu nga riwhu n'ige ka, oro nu rumu nwene rukna, nu rumu nwene rinya, nu nne, nu rumu, nu ekwu, be nu mmekpehni masi, nu budnu kwó okwo n'ige vagwu nu ruwhnu.

³¹ Kọvu agịda ele be ọsno jọobu ele ipne-aznụ, ele ipne-aznụ jọobu ele be ọsno.”

*Jizọsi kwuru ọka gbasịru
 ẹnwu a ke mgba ẹto
 (Mat 20:17-19; Luk 18:31-34)*

³² Nga be zị n'apna neezne Jeruselem, Jizọsi neezne nụ ruwhnu be, o du ele sno apna a ẹhni, ele snogwu a n'aznụ nọtụ ogwnu. O kwuru kwno nri nụ badnụ lawuru wam ichne, panịzo naakanụ be nhne jeeme a.

³³ O kanụ be, “A neezne Jeruselem, be jeegweru Nnwọ ke Badnụ nyewhete n'aka ele risi arịohna nụ n'aka ele zni iwu ele Ju, be jaama a ikpe ẹnwu, gweru a nyee n'aka ele búo ele Ju.

³⁴ Be jeeme a nhne rụmu, gbu a ọnu mini, pñia nhne, gbu a, nga ọbochi ẹto whemernu o jeehi n'ẹnwu lizọ.”

*Arịrio rụmu Zebidi
 (Mat 20:20-28)*

³⁵ Jemisi nụ Jọni rụmu Zebidi, vakwnusi Jizọsi, rịo a, “Nye-zni-nhne, a nọorio ma i menu aị nhne ọbula a jọorio i.”

³⁶ O sịkwa be, “Kini bụ nhne anụ noopio me menu anụ?”

³⁷ Be kanụ a, “Mee kpa a jaadaziri otu n'akarikwnunga i, otu n'akarita i, n'igwugwu i.”

³⁸ Jizọsi kanụ be, “Anụ máa nhne anụ nọorio. Anụ jọonwoli okiko ke me nọonwo? Mọbu be wụli anụ mini ke be nọowu m?”

³⁹ Be kanụ a, “A nwernu rikne.”

Jizōsi kanu be, “Okiko me nonwo bu ke anu jōonwo, mini be wuru m bu ke be jōowu anu.

⁴⁰ Kōvu o dazi n'akarikwnunga m nu akarita m buo ke m n'onyega. O bu ke ele Chiokike bkwatannu a.”

⁴¹ Nga ele sno apna a nri ke gwnarnu nurnu a, be wesanu Jemisi nu Joni ehni k'agida.

⁴² Jizōsi sukwukota be, kanu be, “Anu magwu nu ele be gwnurnu n'ele risi ke ele buo ele Ju neeme ele be nechi kpa o masiri be, ele kwu be ji aka rikne nechi ele zi nu mkpururu be.

⁴³ Kōvu o buo kpa n'esilawuru anu. Nye pioru o buru nye kwu n'esilawuru anu jōobu nye neeznenu anu izi.

⁴⁴ Nye pioru o buru nye mbom n'esilawuru anu, jōobu ohi kpakara anu.

⁴⁵ Kwnornu nu Nnwō ke Badnu vage ma be znenu a izi, kōvu ma o neeznenu ele berere izi, ma o gweru masi budnu a nyee, ma o buru nhne ogbahia agida badnu.”

*Jizōsi gwōru Batimōsi
nye isni*

(Mat 20:29-34; Luk 18:35-43)

⁴⁶ Be vadu Jeriko, nga Jizōsi nonwhoga nu Jeriko, ya nu ele sno apna a nu agida ele badnu, Batimōsi nnwō rukna Timōsi nye kpuru isni dazi nu ngeri apna nonorio nhne.

⁴⁷ Nga o nurnu nu o bu Jizōsi nye Nazareti nee-whe, o panizo neesi okokoba, naakwnakwu a, “Jizōsi, Nnwō Devidi, donu m obirizi.”

⁴⁸ Agịda ele badnụ bigbọru a ma o kpusunime ọnu a, kọvu o siwama k'agịda, “Jị Nnwọ Devidi, dọnu m obirizi.”

⁴⁹ Jizọsi gwuzoru, kaa, “Anụ sukwu a.”

Be sukwu nye isni wam, kanụ a, “Mkpọma si i rikne, lizo, o noosukwu i.”

⁵⁰ O chihwume iwo a, wulizo, kwnusi Jizọsi.

⁵¹ Jizọsi sịkwa a, “Kini bu nhne i pioru me menu i?”

Nye isni wam kaa, “Nyenwe aị, mee ma m whnuru m ọsno.”

⁵² Jizọsi kanụ a, “La, okwnata mkpọma i znohialam ji.”

Ngangam o bete o whnụ ọsno, snornu Jizọsi n'apna.

11

Jizọsi bnazneru

Jeruselem

(Mat 21:1-11; Luk 19:28-40; Jọn 12:12-19)

¹ Nga Jizọsi nụ ele sno apna a naavadu Jeruselem ndundu, n'eli Bẹtifagi nụ Bẹtani, be vadu nụ Rugwu Olivu, o zizne badnụ lawuru nụ rime ele sno apna a.

² O kanụ be, “Anụ zne nụ mgbu matị ke zị nụ ruwhnu anụ, ngangam anụ naabna nụ rime a, anụ jọowhnu nnwọ iyinya be kpogwu eriri, ke o ziko nye daziri n'olu a, anụ tọma a, toya hna.”

³ O zị nye sịkwaru anụ, “Kini mernu anụ neeme nhne ka?” Anụ kaa, “O zị Nyenwe aị mkpa, o jeegwehnahe a kịta.”

⁴ Be znernu whnụ nnwọ iyinya be kpogwu n'ọnu-mgbo ọro zị n'apna, be topiya a.

⁵ Ele gwuzogwu pıi sıkwa be, “Kıni bu nhne anu neeme, noto nnwo iyinya wam?”

⁶ Be kanu be nhne Jizosi karu, be gharu be.

⁷ Be toyanu Jizosi nnwo iyinya wam, wukwasi a iwo be n'olu a, o daziri n'olu a.

⁸ Agida ele badnu gbata iwo be n'apna, ele berere nkala isisi ke be gbuharu n'ohia.

⁹ Ele neezne nu ruwhnu nu ele noosno, neesi okokoba, naakaa,

“Ozana!

Chiokike gozi nye ke naava nu rewhna Nyenwe ai.

¹⁰ Nhne be goziri ogozi bu eli-eze nda i Devidi!

Ozana nu hne kakwo n'olu!”

¹¹ Jizosi bna nu rime Jeruselem, bnazne Oro Nso, nga o lekworu kpakara nhne anya, kpa o bu ogbednachi, o whoga zne Betani, ya nu nri nu badnu lawuru wam, ele sno apna a.

*Jizosi vuru isisi
be kwu figi onu
(Mat 21:18,19)*

¹² N'ekile a, nga be hiri nu Betani naava, wiri gwnuru Jizosi.

¹³ Nga o whuru isisi figi nu hne zi ikere ke nwernu okwukwo budnu, o zne ma o zi nhne o jowhnu n'olu a. Nga o vaduru a ehni, o whuna nhne obula okwolem okwukwo budnu, kwnornu nu o buo ige mkpuru figi.

¹⁴ O kanu isisi figi wam, “O za badnu obula jeeri mkpuru hi n'olu i berere.” Ele sno apna a nuru a.

*Nhne Jizọsi mernu
n'Oro Nsọ Chiokike*

(Mat 21:12-17; Luk 19:45-48; Jọn 2:13-22)

¹⁵ Be vadu Jeruselem, Jizọsi bna Ọro Nsọ Chiokike panizo ọ chihala ele neere, nọ ele nọozu ahia n'Oro Nsọ Chiokike. O kpute ikpechi kpakara ele naagbanwo iwai ruwhnu n'eli nọ ngadna ele neere nduru.

¹⁶ O kwéle badnọ ọbula vuru nhne gawhe Ọro Nsọ Chiokike.

¹⁷ O neezni nhne, naakaa, “Be gbarọ a n'okwukwo nsọ, kaa, 'Be jookwu ọro m ọro okpukpe ke kpakara mba.' Kọvu anọ mernu a ọ bọru ọbna ele buznu.”

¹⁸ Ele risi ariohna nọ ele znı iwu ele Ju nurnu a, pio kpa be joogbu a. Kọvu nọ be turu ogwnu o mee a nhne ọbula, kwnornu nọ nhne o znirni duru agida ele badnọ ẹhni.

¹⁹ N'ige ogbednachi, Jizọsi whọga n'eli-ohna Jeruselem, ya nọ ele sno apna a.

*Isisi figi wam kpọnwurnu
(Mat 21:20-22)*

²⁰ Nga be neezne n'osisi, be whnọ isisi figi wam nọ ọ kpọnwunam dọ egwnugwnu a.

²¹ Pita chenwanya, kanọ a, “Nda-ai-kwu, le isisi figi wam i vuru ọnu kpọnwunam.”

²² Jizọsi sarọ be, “Anọ nwe ọkwnata ovu nọ Chiokike.

²³ N'ezi me kanọ, nye ọbula ke jaakanọ rugwu ka, 'Lizọ, dnabna osimini,' ke nwée mkpọma lawuru, kọvu nọ o kweruru nọ nhne o kwuru jeeme, o jeemenu a kpam.

24 Kam kpayarụ, me naakanụ anụ, nhne ọbula anụ jọorio n'okpukpe, kweru nụ anụ nwehialam a, ọ jọobu masị ke anụ.

25 Berere, nga anụ gwuzoru neekpe okpukpe, anụ gbarụnu nye ọbula nhne ojo o mernu anụ, ma Nda anụ ke zị n'oligwe gbarụnu anụ kpakara nhne ojo anụ. [

26 Kọvu ọ bụru nụ anụ jáagbarụnu badnụ, Nda anụ ke zị n'oligwe jáagbarụnu anụ nhne ojo anụ.”]

Rikne Jizọsi

(Mat 21:23-27; Luk 20:1-8)

27 Be va kwno berere nụ Jeruselem. Nga Jizọsi neezneghari nụ rime Oro Nsọ Chiokike, ele risi ariohna nụ ele zni iwu ele Ju nụ ele okno badnụ vakwnusiri a.

28 Be sịkwa a, “Rikne kịni bụ nhne i ji neeme kpakara nhne ka? Ọ bụ nyele nyernu i rikne neeme i ji neeme be?”

29 Jizọsi sarụ be, “M jaasịkwa anụ otu ajiji, anụ sa m, omekwo, m jaakanụ anụ rẹwhna rikne me ji neeme kpakara nhne ka.

30 Ọwu mini Jọni, o hiri n'oligwe mọbu n'aka badnụ? Anụ sa m.”

31 Be kwu a n'esilawuru be, kaa, “Ọ bụru nụ a kaa, ‘O hiri n'oligwe,’ ọ jaasịkwa aị, ‘Kini mernu anụ kwéle a?’

32 Kọvu ọ bụru nụ a kaa, ‘O hi n'aka badnụ...’ ” (Be nọotu ogwnu ele badnụ kwnornu nụ kpakara badnụ kweru nụ Jọni bụ nye ọwhnurninya n'ezi.)

33 Be sarụ Jizọsi, “A máa.”

Jizọsi kanụ be, “M jáaka masịnu anụ rẹwhna rikne me ji neeme kpakara nhne ka.”

12

*Elulu ele ernalu ernalu vaini
(Mat 21:33-46; Luk 20:9-19)*

¹ Jizosi panizo nookwunu be oka n'elulu, "Otu nyerukna kparu vaini, o gba a mgbugba gburugburu. O gwu igbodo hne be zosna mkpuru isisi. O wuru oro olu ele nse, o gweru ernalu wam yisi n'aka ele jeelekota a, whoga zne n'eli berere.

² Nga ige o gho mkpuru duru, o ziznenu ele ernalu ernalu wam otu ohi, ma o nahia be agwna mkpuru hi n'ernalu wam.

³ Be nwugwu a, pnja nhne, zihala a n'aka etekne.

⁴ O zizne kwno ohi berere, be liwa nye ki risi, mee kwno a nhne iwhnerne.

⁵ O zizne kwno nye berere, be gbu nye ki, nu agida ele berere, be pnja agwna nhne, gbu agwna be.

⁶ "Nyerukna wam nwernu otu badnu ke gwarnu, bu nnwo o whnuru n'anya, o zizne a n'ipne-aznu, kaa, 'Be josobisinu nnwo m.'

⁷ "Kovu nu ele ernalu ernalu wam kwuritaru n'esilawuru be, 'Ka bu nye jeeri mkpe nye nwe ernalu ka, anu va ma a gbu a, nhne mkpe a jobu ke ai.'

⁸ Be nwugwu a gbu a, tuwhume a n'aznu ernalu wam.

⁹ "Kini bu nhne nye nwe ernalu wam jeeme? O jaava, gbumekwo ele ernalu wam, gweru ernalu wam nyewhete n'aka ele berere.

¹⁰ Anu gwnuna nhne be gbaru n'okwukwo nsu, 'Akaworugwu ke ele noowu oro juru, kiyam gholam risi nsukala oro.

¹¹ Ka bu ernalu Nyenwe ai,

ọ bụ nhne ndu-ẹhni n'anya aị'?"

¹² Be pio kpa be jọonwugwu a, kwnornu nụ be mahiari nụ be bụ ele o kwno tñu elulu ka. Kọvu nụ be tũru ogwnu agida ele badnũ wam, be gharũ a lahna.

Otu ntũ-ẹli

(Mat 22:15-22; Luk 20:20-26)

¹³ Be ziznenu a agwna ele Farisi nũ ele dagwũnu Erodu ma be nwũgwu a n'ikwu-ọnu a.

¹⁴ Be vaa, kanũ a, "Nye-zni-nhne, a magwũ nũ i kwu ezi ọka, ị sọ badnũ anya, kwnornu nũ ị lé badnũ anya nũ ruwhnu, kọvu i neezni apna Chiokike n'ezi ọka, ọ bũru ọma n'iwu a tũ ntũ nyee Siza, sọbu nũ ọ búo ọma? A tũ sọbu a tũ?"

¹⁵ Jizọsi mahiari ruwhnu lawũru be. O kanũ be, "Anũ kwno kini naakpa m iru? Gweyanũ m otu mkpũru iwai me ledu a anya."

¹⁶ Be gweyanũ a, ọ sika be, "Nyele nwe ruwhnu nũ rẹwhna ka?"

Be kaa, "Siza nwe."

¹⁷ Jizọsi kanũ be, "Anũ nyee Siza nhne ke Siza, nyee masi Chiokike nhne ke Chiokike."

O du kpakara be ẹhni nũ hne ọ zị.

Ajji gbasiri olizọ n'ẹnwu

(Mat 22:23-33; Luk 20:27-40)

¹⁸ Ele Sadusi, ka bũ ele karũ nũ olizọ n'ẹnwu zá, vakwnusi Jizọsi, sika a,

¹⁹ "Nye-zni-nhne, Mozizi gbarũ n'ọkwukwo nyee aị, kaa, 'O bũru nũ nwene rukna nyerukna nwũ, ghasa nnwerne a, kọvu nũ o nwée rũmu, nwene a rukna jooluru nnwerne a mũhianu nwene a rukna rũmu.'

20 Rumu nne ɛsau zı, ke mbom luru nnwerne nwuma, nwée nnwo,

21 ke ɛbo kwuru a, o nwu ması, o nwée nnwo, ke ɛto ması otu aka wam.

22 Ele rukna ɛsau wam nwée nnwo, n'ipne-aznu kpakara be nu nwerinya wam nwukparu.

23 N'olizo n'enwu, nyerinya wam o jobu nnwerne nyele n'esilawuru be, kwnornu nu be ɛsau luru a nu nnwerne?"

24 Jizosi saru be, "Anu gahieru apna, anu maá nhne be gbaru n'okwukwo nsó, mɔbu rikne ke Chiokike.

25 Kwnornu nu nga be jeehi n'enwu lizo, be lu nnwerne, be gbó nzi, kovu nu be nu lele ele enine izi n'oligwe.

26 Nu nhne gbasiri olizo n'enwu ke ele nwurnu onwu, anu gwnuna n'okwukwo Mozizi nu hne be gbaru nhne gbasiri isisi mati wam neerne bekwnu, kpa Chiokike jiri kanu a, 'Mawa bu Chiokike ke Eberham, nu Chiokike ke Aziki, nu Chiokike ke Jekopu'?

27 O buo Chiokike ke ele nwurnu onwu, kovu Chiokike ke ele zi budnu. Anu naagahie apna k'agida."

Iwu ke kakwo ibne a
(*Mat 22:34-40; Luk 10:25-28*)

28 Otu nu rime ele zni iwu ele Ju varu, nu hne be nesikwarita ehni be ajji, o maharu nu Jizosi sakwaru be nkari, o sikwa a, kaa, "Ndaa ke bu ke mbom nu kpakara nhne be nyernu n'iwu?"

29 Jizosi saru a, kaa, "Ke mbom bu ka, 'Anu bnote nsnı Izireli, Nyenwe ai Chiokike ai, Nyenwe ai bu otu.

30 I jọowhnu Nyenwe aị bụ Chiokike i n'anya, hite nụ kpakara mkpọma i, hite nụ kpakara enine i, hite nụ kpakara ọriri i, hite nụ kpakara iknernema i.

31 Ke ẹbo bụ ka, 'I jọowhnu nye agbatibi i n'anya lele ẹhni i.' Ọ zà nhne berere be nyernu n'iwu ke kakwo ka."

32 Nye zni iwu ele Ju wam kaa, "Owe! Nye-zni-nhne, i kalam n'ezi nụ ọ bụ otu Chiokike, nụ ọ zà nye berere, okwolem ya,

33 nụ ọ whnụ a n'anya hite nụ kpakara mkpọma i, hite nụ kpakara ọghohia i, hite nụ kpakara ikn-ernema i, nụ ọ whnụ nye agbatibi i n'anya lele ẹhni i, kakwo kpakara ariohna ọkporne bẹkwu nụ ariohna berere."

34 Nga Jizọsi whnurnu nụ ọ sakwayarụ a lele nye nwernu akoniche k'ezi, ọ kanụ a, "I zila ikere nụ hne ẹli-eze Chiokike zi."

Nga ka wheru, ọ zima nye berere nwernu rikne sika a ajji berere.

Karaisi bụ nnwọ nyele?

(Mat 22:41-46; Luk 20:41-44)

35 Nga Jizọsi neezni nhne n'Oro Nso Chiokike, ọ sika, "Ndaa kpa ele zni iwu ele Ju jiri naakaa nụ Karaisi bụ Nnwọ Devidi?"

36 Enine Nso hiri n'onu Devidi kwu ọka, kaa,
 'Nyenwe aị kannu Nyenwe m,
 Daziri ẹli n'akarikwnunga m,
 tem du nga me jaabita ele irno i
 nụ mkpururu ọchi i lawuru.'

37 Devidi n'iwuru a noosukwu a Nyenwe a, ndaa kpa o jeeji buri nnwọ Devidi?"

*Anu zeru ele zni iwu
ele Ju*

(Mat 23:1-36; Luk 20:45-47)

Agida ele badnu wam jiri snarnima nurnu ikwu-
onu a.

³⁸ Kpa Jizosi neezni nhne, o kaa, “Anu zeru ele
zni iwu ele Ju, ele o naaması be o wo iwo awura
ogologo naagaghari, o naaması be ele badnu nee-
bekwu be ikwu n'ahia,

³⁹ nu o dazi nu risi ngadna n'oro ogbako ele Ju, ma
nu ngadna kakwo mma n'ogbako iriri anu.

⁴⁰ Be bu ele neeridna oro ele rinya nzi be
nwurnu, neekpe ogologo okpukpe ma ele badnu
whnu be. Be jaata awhnwhnu ke kakwo.”

*Nkesi ke nwerinya
nzi a nwurnu
(Luk 21:1-4)*

⁴¹ Jizosi daziri n'Oro Nso Chiokike kete ruwhnu
nu hne be bitaru nhne ntı, o whnurnu agida ele
badnu hne be notusi iwai nu nhne be notubna
iwai. Agida ele kwu notusi k'agida.

⁴² Otu nyerinya, bu womboni ke nzi a nwurnu
varu, tubna mkpuru iwai matı lawuru, ke whuyaru
iwai matı.

⁴³ O sukwu ele sno apna a, kanu be, “Me kanu
anu ezi oka, nwerinya ka bu womboni ke nzi a
nwurnu, tusiri iwai kakwo ke kpakara ele berere
tubnarnu hne be bi iwai.

⁴⁴ Kpakara be masiri aka n'agida ekwnu be
nwernu gweboru tusi, kovu nu ya, womboni wam,
tusikworu kpakara nhne o nwernu o jiri wuru.”

13

Be joolulu Oro Nso

Chiokike

(Mat 24:1,2; Luk 21:5,6)

¹ Nga Jizosi whuyaru n'Oro Nso Chiokike, otu nu rime ele sno apna a karu, "Nye-zni-nhne, le kpa oro ele ka nu akaworugwu be jiri wu be nu mma."

² Jizosi saru a, "I whnu na kpakara oro kwu ele ka? Otu akaworugwu jógwuzo n'olu ibne a hna, be jaakwnadna kpakara be n'eli."

Mmekpehni nu

Okpakna ehni

(Mat 24:3-14; Luk 21:7-19)

³ Nga o daziri eli n'olu Rugwu Olivu ke kegwu ruwhnu n'Oro Nso Chiokike, Pita nu Jemisi, nu Joni, nu Anduru, sikwa a ichne, kaa,

⁴ "Kanụ aị nga kpakara nhne ele ka jeeme. Kịni jeegesi ige nhne ka jeemezu?"

⁵ Jizosi kanu be, "Anya du anu eli, o zi nye obula duhie anu."

⁶ Kwnornu nu agida ele badnu jaava nu rewhna m, naakaa, 'Mawa bu Karaịsi,' be jooduwhu agida ele badnu.

⁷ Nga anu jonu ogwnu nu otnutnu ogwnu, anu tuko ogwnu. Kpakara nhne ka jeebe osno mee, kovu okwukwo nhne yooduge.

⁸ Mba jeelizo megidne mba berere, eli-eze jeelizo megidne eli-eze berere, eli otne enye jaazi nu hne zi odo n'odo, okwnunyo jaazi. Kpakara nhne ka jonu lele opanizo igbugbu omumu nnwo.

⁹ "Kovu anya du anu eli hne anu zi. Be jeegweru anu nyee n'aka ele ikpe zi odo n'odo, be jaapnia anu"

nhne n'oro ogbako ele Ju zị ọdo n'odo, anụ joogwuzo nụ ruwhnu ele risi nụ ele eze kwnornu nụ me, ma ọ buru nhne akebne.

¹⁰ Be jeeberu osno kpọ okwo izi oma nụ kpakara mba.

¹¹ Nga be nwugwuru anụ gweya anụ n'oro ikpe, anụ béekwadia osno rigbu ẹhni anụ n'oriri nhne anụ jaakaa. Anụ kwu nhne ọbula Chiokike karu anụ kwu ige wam, kwnornu nụ Enine Nso jookwunu anụ onu anụ.

¹² Nwene jeegweru nwene a nyee n'aka ẹnwu, nda jeegweru nnwọ a nyemakọ. Rumu jeelizo megidne ele mụnu be, mee ma be nwụ ẹnwu.

¹³ Kpakara ele badnụ joosno anụ irno kwnornu nụ me. Kọvu be jọoznohia nye ọbula ke jaaknata mkpoma, dazigidne dụ okwukwo kpakara nhne.

*Awhnụwhnu ke
ele Jeruselem jaata*

(Mat 24:15-28; Luk 21:20-24)

¹⁴ “Nga anụ jọowhnu nhne ruru ọru ke zị nụ hne o kwésile ọ zị, nye nọogwnu nhne ka, ghọhia, ele zị nụ ẹli Judiya n'ige wam gbazne n'olu rugwu.

¹⁵ Nye ke zị n'olu ọro, o híednakọ, mọbu bna nụ rime ọro zne kwahala nhne zị nụ rime ọro a.

¹⁶ Nye zị masị n'ekwu, ọ lánna aznụ zne chiri iwo a.

¹⁷ Awhnụwhnu jaazinu ele rinya zị rime nụ ele neechi nnwọ rẹma n'ige wam.

¹⁸ Anụ kpe okpukpe ọ búko n'ige okirika.

¹⁹ Kwnornu nụ ige wam agịda mmekpẹhni jaazị ke zikolele ke nga ọwa ke Chiokike kpuru panizoru dụ kịtna, owe, ọ jáazị kwno berere.

²⁰ O b̄uru n̄u Nyenwe āi méne ōbochi wam z̄i ichichi, ō z̄a bad̄nu ōbula be j̄ōoznohiali. K̄ovu kwnornu n̄u ele ō h̄ohiaru, o mernu ōbochi wam z̄iri ichichi.

²¹ “N’ige wam, ō b̄uru n̄u bad̄nu ōbula jaakan̄u an̄u, ‘Le, Karāisi z̄i hna,’ m̄obu ‘Ō z̄i p̄iari,’ an̄u kwéko.

²² Karāisi aghalaghala z̄i ōdo n’odo, n̄u ele ōwhnurninya aghalaghala z̄i ōdo n’odo j̄ōowo iw̄hne, neegesi nhne elekema n̄u nhne ndu-eh̄ni z̄i ōdo n’odo, ma be duwhu ele Chiokike h̄ohiaru, ō b̄uru n̄u ō jeekwe omume.

²³ K̄ovu anya d̄u an̄u ēli, m̄ bele m̄ ōsno kakwnonu an̄u kpakara nhne nga be yéemene eme.

Nnw̄o ke Bad̄nu vawa

(Mat 24:29-31; Luk 21:25-28)

²⁴ “N’ige wam, nga mmekp̄eh̄ni wam wemernu,

‘Ēhnam jaagba ōchichiri,
ēnwa j̄eenye iw̄hne a,

²⁵ mb̄o ke oligwe jaadna,

kpakara iknernema ke z̄i oligwe joohnio ohnio.’

²⁶ “N’ige wam be j̄ōowhnu Nnw̄o ke Bad̄nu hne ō naava n’okne iknernema n̄u igwugwu.

²⁷ O jeezihala ele enine izi a be hite n̄u ruwhere ēno k’owa ch̄ikota ele ke a Chiokike h̄ohiaru, hite n’otu ōsotoma ōwa d̄u n’ōsotoma berere.

M̄uhia nhne hite n’isisi

be kwu figi

(Mat 24:32-35; Luk 21:29-33)

28 “Anụ muhia nhne hite n'isisi figi. Nga nkala a zılam pıali pıali, nooruhia ması ọkwukwo ikne, anụ mahia nụ nduru-mini zı ndundu.

29 Kpam ması, nga anụ jọowhnu kpakara nhne ka hne be beteru neeme, anụ mahia nụ n'ige wam zı ndundu, n'ọnu-mgbo.

30 Me kanụ anụ ezi ọka, ebiri ka jéewhe rıa rıa tem kpakara nhne ka mezu.

31 Oligwe nụ ọwa jaagawhe, kọvu kpakara ikwu-ọnu m jáagawhe rıa rıa.

*Ọ zá nye magwụ
ọbochi wam
(Mat 24:36-44)*

32 “Kọvu ọ zá nye magwụ ọbochi wam mọbu ọtnu-ige wam, ele enine izi zı n'oligwe máa ması, Nnwọ wam máa ması. Okwolem Nda m kpọi bu nye magwụ.

33 Anya dụ anụ ẹli, anụ se nse, kpe okpukpe, kwnornu nụ anụ máa nga ige jaava.

34 Ọ nụ lele hne badnụ neezne nhne, nga ọ nọowhoga n'ọro a, o nyewhete ọro a n'aka ele ọhi a, ma be legidne a anya. O nyee kwno nye ọbula nhne ọ jọornu, nyee ması nye ke zı n'ọnu-mgbo iwu o se nse.

35 Kam kpayarụ, anụ neese nse, kwnornu nụ anụ máa nga nyenwe ọro jaava, mọbu n'anyasnu, mọbu n'esilawuru abalı, mọbu ige ọchichi kwnarnu ẹkwna, mọbu n'ọsisi.

36 Anụ se nse, ọ zı ọ va kpurugadnam, whnụ hne anụ neezni anyarna.

37 Nhne me naakanụ anụ bu nhne me naakanụ kpakara badnụ, anụ se nse.”

14

*Be gbarụ iznuznu
o gbu Jizọsi*

(Mat 25:1-5; Luk 22:1,2; Jọn 11:45-53)

¹ Ọ gwnarnụ ọbochi lawuru ọ dụ Iriri Ọgawhe nụ Iriri Brẹdi Whúge Ọwhu. Ele risi ariohna nụ ele zni iwu ele Ju noopio apna be jọonwugwu Jizọsi n'aghigo, ma be gbu a.

² Be karụ, “Kọvu ọ jọobu n'Iriri ka, ọ zị a kpasu ọhna.”

*Be teru Jizọsi mọno
nụ Bẹtani*

(Mat 26:6-13; Jọn 12:1-8)

³ Nga Jizọsi zị nụ Bẹtani n'oro Saịmoni nye riaru nchnichna, ọ dazị neeri wiri. Otu nyerinya bnan-yarnụ, nye vu mọno otute zị n'ite alabasita gburu ọnu be ji ẹknarna nadi zị snam mee. Ọ lịwama ite wam, wụsi mọno otute wam nụ risi Jizọsi.

⁴ Agwna ele zị pị weru ẹhni k'agida naakaa, “Kịni kpayarụ be wuwuru mọno otute ka etekne?”

⁵ Be znernu ere ya riwhu mkpuru iwai ẹto nyee ele mboni.” Be naatamunu nwerinya wam.

⁶ Jizọsi kanụ be, “Anụ gharụ a! Ndaa nhne anụ kwno neemekpa a ẹhni? Ọ rnurnu ẹnu ọma n'ẹhni m.

⁷ Ele mboni nụ anụ zị ige ọbula, ige ọbula anụ pioru, anụ nwernu rikne menu be nhne ọma, kọvu nụ anụ jéenwehịa m ige ọbula.

⁸ O mernu nhne o nwernu rikne o mee. Ọ beru ọsno te ẹhni m mọno, bıkwata m n'olili m.

⁹ Me kanụ anụ ezi ọka, hne nụ hne ọbula be kpọru okwo izi ọma ka nụ kpakara ọwa, be jookwuhịa

nhne nwerinya ka mernu, ma ọ bụru nhne be jeeji neechenwanya a.”

Judası kweruru o re Jizosi
(*Mat 26:14-16; Luk 22:3-6*)

¹⁰ Judası Isikarioti, otu nụ rime nri nụ badnụ lawuru ele sno apna a, znekwnusiri ele risi ariohna, ma o gweru Jizosi nyee n'aka be.

¹¹ Nga be nurnu a, be nwudnarnu, be kwe o nyee a iwai. O bete o pio oghere o jeegweru Jizosi nyee be.

Jizosi nụ ele sno apna a
riri Iriri Ogawhe

(*Mat 26:17-25; Luk 22:7-14,21-23; Jon 13:21-30*)

¹² N'ọbochi mbom ke Iriri Brędi Whuge Owhu, nga be naakwa ariohna atnurnu Ogawhe, ele sno apna a sikwa Jizosi, “Ndaa hne ị pioru ma a mekwatanu ị ma i ri Iriri Ogawhe?”

¹³ O zihala badnụ lawuru nụ rime ele sno apna a, ọ kanu be, “Anu zne nụ rime Jeruselem, otu nyerukna vugwu idudu mini jaavakwnusi anu, anu sno a.

¹⁴ Anu snornu a zne n'oro obula o bnaznenu, anu kanu nyenwe oro wam, ‘Nye-zni-nhne karu, Ndaa hne oro ele izne m zi, hne me nụ ele sno apna m jeeri Iriri Ogawhe?’

¹⁵ O jeegesi anu otu onu-oro zi rude n'oro olu be mekwataru, bikwata masi. Anu mekwatanu ai pi.”

¹⁶ Ele sno apna a whoga, bna nụ Jeruselem whnukpa kpakara nhne lele kpa Jizosi karu. Be mekwata Iriri Ogawhe.

¹⁷ N'ogbednachi, Jizosi nụ nri nụ badnụ lawuru ele sno apna a snornu va.

18 Nga be daziri ẹli neeri wiri, Jizọsi kaa, “N'ezi me kanu anu, otu badnu n'esilawuru anu, bu nye me nu a neeriko wiri, jeere m.”

19 O panizo noogbu be igbugbu n'ovu, be neesikwa a n'otu n'otu, “O bu mawa sa?”

20 O kanu be, “O bu otu nyenum nu rime anu nri nu badnu lawuru, nye me nu a noosnukota wiri n'otu agbugba wiri.

21 Nnwọ ke Badnu jaala lele kpa be gbaru a n'okwukwo nsọ gbasiri a, kovu nu awnhnuwhnu jaazinu nyerukna wam be jeehi n'aka a re Nnwọ ke Badnu. O buru oma o buru be muna nyerukna wam.”

Wiri Anyasnu Nyenwe ai

(Mat 26:26-30; Luk 22:14-20; 1 Kor 11:23-25)

22 Nga be zi neeri wiri, Jizọsi gweru bredi, tunu Chiokike mmamma, nyawama a, nyee ele sno apna a, kaa, “Anu gweru, ka bu ano-ehni m.”

23 O gweru okiko, tu mmamma o nyee be, kpakara nworu nu rime a.

24 O kanu be, “Ka bu onarna m ke ogba-njo-ehni be nowusi kwnornu agida badnu.

25 N'ezi me kanu anu, m jonwoma m manya hi n'isisi vaji whuya rja rja tem du n'obochi me jonwo a ke ikne n'eli-eze Nda m.”

26 Nga be gwnukparu eri, be whoga zne nu Rugwu Olivu.

Jizosi karu nu Pita

jogonahoru a

(Mat 26:31-35; Luk 22:31-34; Jon 13:36-38)

27 Jizosi kanu be, “Kpakara anu jaagbakwo eso, kwnornu nu be gbaru a n'okwukwo nsọ, kaa,

‘M joogbu nye nọoznu atnuru,
atnuru a jaagbakeme.’

28 Kọvu nga me hiri n'enuwụ lizo, m jeebe anụ osno zne Galili.”

29 Pita kanụ a, “Ọ bụrubi nụ kpakara badnụ gbakwo ẹso, kọvu m jáagba ẹso.”

30 Jizọsi kanụ a, “N'ezị me naakanụ i, n'abalị ka, nga okne ọchichi náakwnana ẹkwana mgba lawuru, i jọgonahoru m mgba ẹto.”

31 Kọvu o kwusiri rikne k'agida kaa, “Ọ bụru nụ ọ zị mkpa nụ m joosno i nwụ, m jọgonahoru i rịa rịa.” Kpakara be kakwnornu kpa.

*Jizọsi kperu okpukpe
nụ Gẹsemani*

(Mat 26:36-46; Luk 22:39-46)

32 Be vadu nụ hne be kwu Gẹsemani, Jizọsi kanụ ele sno apna a, “Anụ daziri hna, me kpe okpukpe.”

33 O kwuru Pita nụ Jemisi nụ Jọni, ọ panizo o gbu a igbugbu nụ o wute a nụ mkpoma.

34 Ọ kanụ be, “O noogbu m mkpoma m igbugbu k'agida dū ẹnwu, anụ dazigidne hna, se nse.”

35 O znetu nụ ruwhnu, dna kpu ruwhnu n'eli kpe okpukpe, ma ige awhnuwhnu ka gawheru a, ọ bụru nụ o jeekwe omume.

36 Ọ kaa, “Papa, Nda m, i meli nhne dum, gwemenu m okiko awhnuwhnu ka, kọvu ọ bụo nhne me pioru, kọvu nhne i pioru.”

37 Ọ va whnụ hne be neezni anyarna, ọ kanụ Pita, “Saiṣoni, i neezni anyarna? I nwée rikne se nse otu ọtnu-ige?

³⁸ Anụ se nse, kpe okpukpe, ọ zị anụ dnabna nụ rime ọrnurna. Enine ke badnụ zị bẹkwnu, kọvu nụ anọ-ẹhni zịla rikne.”

³⁹ O zne kwno berere kpe okpukpe, nookwu otu ọka wam.

⁴⁰ Ọ yahna berere whnụ ele sno apna a hne be neezni anyarna kwnornu nụ anya be zị rinya, be máa nhne be jaasa a.

⁴¹ Ọ va ke mgba ẹto, ọ kanụ be, “Anụ zị kọriri neezni anyarna, noozukwa inwe? Ọ kwna kpam, ọ dulam, be neegweru Nnwọ ke Badnụ resi n'aka ele mmehie.

⁴² Anụ lizọ, ma a zne. Le nye neegweru m nyee zị ndundu.”

Be nwudnernu Jizọsi

(Mat 26:47-56; Luk 22:47-53; Jọn 18:3-12)

⁴³ Ngangam Jizọsi kpugwu ọka wam n'ọnu, Judasị, otu nụ rime nri nụ badnụ lawuru wam ele sno apna a varụ, ya nụ agida badnụ ele ji ama-ogwnu nụ okpiri hite nụ hne ele risi ariohna nụ ele zni iwu ele Ju nụ ele okno badnụ zị va.

⁴⁴ Nye reru a nyenem be nhne elekema, kaa, “Nye ọbula ke me joosnutu ọnu nye wam bụ ya, anụ nwugwu a, duru a zne.”

⁴⁵ Ngangam Judasị varụ, o znekwnusi Jizọsi, sukwu a, “Nye-zni-nhne.” O snutu a ọnu.

⁴⁶ Be tükwasi Jizọsi aka, nwugwusi a rikne.

⁴⁷ Otu n'ele gwuzogwu ndundu mniohiaru ama-ogwnu a, gbu nye izi nye risi ariohna, bihala a nsị.

⁴⁸ Jizọsi kanụ be, “Anụ kpagwu ama-ogwnu nụ okpiri whuya ọ nwugwu m lele m bụ m nye neemegidne iwu ẹli?”

49 Kpakara ọbochi me nụ anụ zị n'Ọro Nsọ Chiokike hne me neezni anụ nhne, anụ nwúge m, kọvu kpakara nhne ka mernu ma nhne be gbarụ n'ọkwukwo nsọ mezu.”

50 Kpakara ele sno apna Jizọsi ghasarụ a gbawhu.

51 Otu wikoro snogwu Jizọsi, nye ji iwo abọchna kpusni ẹhni a. Be nwụgwu a,

52 ọ sịgbasi iwo abọchna a, gbarụ ẹto gbawhu.

*Jizọsi gwuzo nụ ruwhnu
ele eze-ikpe*

(Mat 26:26,57-68; Luk 22:54,55,63-71; Jọn 18:13,14,19-24)

53 Be duru Jizọsi znekwnusi nye risi ariọhna, kpakara ele risi ariọhna nụ ele okno badnụ nụ ele zni iwu ele Ju gbakọru.

54 Pita snornu a nụ hne zị ikere, bna nụ rime ederezi nye risi ariọhna, ọ daziri n'esilawuru ele nse, naanya bẹkwnu.

55 Ele risi ariọhna nụ kpakara ele eze-ikpe pioru nhne be ji gbagidne Jizọsi akebne ma be gbu a, be píojiála.

56 Agida ele badnụ gbarụ akebne aghalaghala gbagidne a, kọvu nụ akebne be búo otu.

57 Agwna be lizọ, gba akebne aghalaghala gbagidne a, naakaa,

58 “A nurnu hne ọ karụ, ‘M jaakwnadna Ọro Nsọ Chiokike ka be jiri aka wu, n'ọbochi ẹto m joowu Ọro Nsọ berere ke be jíle aka wu.’ ”

59 Kọvu nụ akebne be dnákọtala.

60 Nye risi ariohna lizoru n'esilawuru be sika Jizosi, kaa, “O za nhne i naasa? Kini bu akebne ka ele badnu ka naagbagidne i?”

61 Kovu Jizosi kpusnirnu onu, o za nhne o saru. Nye risi ariohna sika kwona a, “O bu jiwa bu Karaisi, Nnwọ Chiokike be goziri ogozi?”

62 Jizosi kaa, “O bu mawa, anu jowohnu masi Nnwọ ke Badnu hne o dazi n'akarikwnunga Chiokike ke bu Dikne, naava masi n'erumeru oligwe.”

63 Nye risi ariohna dowama iwo a, kaa, “Ndaa nhne a kwona noopio ele akebne berere?”

64 Anu nurnu okwulu wam o kwuru kwugidne Chiokike, kini bu echiche anu?”

Kpakara be marnu a ikpe enwu, kaa, “O kwesiri o nwu enwu.”

65 Agwna be panizo o gbusi a onu-mini, nu o knesni a ruwhnu, nogo a aka, naakanu a, “Whnunu ai owhnurninya.” Ele nse donawhuru be Jizosi, nogo aka.

Pita gonahoru Jizosi

(Mat 26:69-75; Luk 22:56-62; Luk 18:15-18,25-27)

66 Nga Pita zi nu ederezi, otu nnwọ oknornokno ele neeznenu nye risi ariohna izi varu.

67 Nga o whnurnu Pita naanya bekwnu, o le a anya, kaa, “Ji n'iwuhuru i nu Jizosi nye Nazareti zi.”

68 Kovu o goru kaa, “M maam, m ghohiala m nhne i naakaa.” O whoga zne n'onu-mgbo, okne ochichi kwona ekwna.

69 Woknornokno wam whnu a, o naakanu kwona ele gwuzo ndundu, “Nwerukna ka bu otu nu rime be.”

⁷⁰ Pita gọ kwno berere.

Nga ige matị whemernu ele gwuzo ndundu kanu Pita berere, “N’ezi, ị bụ otu nụ rime be, kwnornu nụ ị bụ nye Galili.”

⁷¹ O panizo nọogo ngugo, nọodu risi, naakaa, “M máam nyerukna ka anụ nookwu oka a.”

⁷² Ngangam, okne oichichi kwnarnu ekwna ke mgba lawuru. Pita chenwanya ikwu-onu wam Jizosi kwunnu a, “Nga okne oichichi yáakwnana ekwna mgba lawuru, ị jogonahoru m mgba eto.” Nga o chenwanyarnu a, o kwna ekwna.

15

*Jizosi gwuzo nu
ruwhnu Paileti*

(Mat 27:1,2,11-14; Luk 23:1-5; Jọn 18:28-38)

¹ N’onu osisi, ele risi ariohna nụ ele okno badnu nụ ele zni iwu ele Ju nụ kpakara ele eze-ikpe gbaru iznuznu, be kne Jizosi eriri, duru a zne, gweru a nyewhete n’aka Paileti.

² Paileti sika a, “Ị bụ eze ele Ju?”

Jizosi saru a, “Owe! Jị n’iwhuru i karu kpatam.”

³ Ele risi ariohna noobno a agida nhne.

⁴ Paileti sika kwno a berere, “O zá nhne i naasa? Le agida nhne be noobno i.”

⁵ Kọvu Jizosi sala nhne obula. Ka duru Paileti ehni.

Be marnu Jizosi ikpe enwu

(Mat 27:15-26; Luk 23:13-25; Jọn 18:39---19:16)

⁶ N’Iriri Ogawhe obula Paileti nesigbasinu be otu nye ikelu, nye be rioru a.

⁷ Otu nye zı n'ikelu be nookwu Barabası nye zı n'ikelu ya nı ele lizoru lısi ele risi ọchichi ọgwnu. O gburu badnu n'ogwnu wam.

⁸ Agida ele badnu wam panizo nọorio Paleti ma o menu be lele kpa o ji neemenu be.

⁹ Paleti sikwaru be, “Anu pioru me sigbasinu anu eze ele Ju?”

¹⁰ O mahari nu ele risi ariona kwuyannu a Jizosi kwnornu owho-anya.

¹¹ Kọvu ele risi ariona sigidnenu igbudu ele badnu wam be kaa o sigbasinu be Barabası, o buo Jizosi.

¹² Paleti sikwaru berere, “O bu kini nhne anu pioru me mee nye wam anu nookwu eze ele Ju?”

¹³ Be siwama okokoba berere, “Kpogidne a n'ogba.”

¹⁴ Paleti sikwa be, “Kini mernu? Kini bu nhne ojo ke o mernu?”

Be siwama okokoba ke kakwo, “Kpogidne a n'ogba.”

¹⁵ Kpa Paleti pioru o mee nhne jaaması agida ele badnu wam, o sigbasinu be Barabası. Nga o pniakworu Jizosi nhne, o gweru a nyewhete be ma be kpogidne a n'ogba.

Ele ogwnu kpariri Jizosi

(Mat 27:27-31; Jon 19:2,3)

¹⁶ Ele ogwnu duru Jizosi bna n'obna nye ọchichi. Be sukwukota kpakara odobiri ele ogwnu.

¹⁷ Be wosi a iwo naachna odno odno, be kpa okpu igwnu, kpusi a nu risi.

¹⁸ Be panizo neebekwu a, naakaa, “A bekwulem ji, Eze ele Ju.”

19 Be gweru isisi n'eli a n'risi, n'ogbu a o'nu-mini, gbu mpnerne o'chi n'eli, kponu a risi eli.

20 Nga be mekworu a nhne rumu, be tuma a iwo odno odno wam, wosi a kpakara iwo a. Be duru a zne ma be kpogidne a n'ogba.

*Be kpogidnenu Jizosi
n'ogba*

(Mat 27:32-44; Luk 23:26-43; Jon 19:17-27)

21 Be sigidne otu nye neewhe ewhe, kanu a, o vuru o'gba a. Nye ka bu Saimoni nye Sirini, nda Alekizanda nu Rufosi, hne o hi n'aznu mba naabnanya Jerusalem.

22 Be duru Jizosi zne nu hne be kwu Gologota, ke bu "Hne Okpokoro Risi."

23 Be nyega a manya be gwaru maa, kovu nu o nwona a.

24 Be kpogidne a n'ogba, ele ogwnu ke iwo a n'esilawuru be nga be vukworu ogbanuchi ke gesiri ke nye obula jeegwe.

25 O bu nu otu-ige tolu* n'osisi nga be kpogidnenu a n'ogba.

26 Be gbaharu nhne be bno'nu a, "Eze ele Ju."

27 Be kpogidnenu ya nu ele rukna lawuru nooznu buznu n'olu o'gba, otu badnu n'akarikwnunga a, nye ke berere n'akarita a.

[

28 Nhne be gbaru n'okwukwo nso mezuru ke karu, "Be gwnukotaru ya n'ele aruru-eli."]

* 15:25 otu-ige tolu: okwukwo ke mbom kwuru ige awa ke eto

29 Ele naagawhe naakaja a, neewhnuwhne risi be, naakaa, “Ngwanụ! Jị nye jaakwnadna Ọro Nsọ Chiokike, wu kwno a n'ọbochi ẹto.

30 Znọhia ẹhni i, hi n'olu ọgba hiedna.”

31 Ọ bụ masị kpa ele risi ariọhna nụ ele zni iwu ele Ju naakparị a n'esilawuru be, naakaa, “Ọ znọhiaru ele berere, o nwée rikne znọhia ẹhni a.

32 Karaịsi eze Izireli, hi n'olu ọgba hiedna kịta, ma a whnụ, kweru masị.”

Ele be kpọgidnenu be nụ Jizọsi n'olu ọgba zị masị naakparị a.

Enwu Jizọsi

(Mat 27:45-56; Luk 23:44-49; Jọn 19:28-30)

33 Hite n'esilawuru iwhnehnie,[†] ọchichiri gbas-nirni kpakara ẹli wam dụ n'ọtnu-ige ke ẹto.[‡]

34 N'ọtnu-ige ke ẹto, Jizọsi jiri okne nkọli siwama, “Eloi, Eloi lama sabatani,” ke bụ, “Chiokike m, Chiokike m, kịni mernu i ghasarụ m?”

35 Agwna elè gwuzogwu ndundu, nga be nurnu a, be naakaa, “Bno nsni, o noosukwu Ẹlaija.”

36 Otu nyenum gbarụ ẹso, gweru manya gbarụ ọka rusi sponji ke zị n'isisi nụ rime a, nyee Jizọsi ma ọ nwọ, kaa, “Gharụ a, a lesi ma Ẹlaija jaava o gwedna a n'ọgba.”

37 Jizọsi gweru okne nkọli si okokoba, nwebime inwe.

38 Ikpe obnosni ke Ọro Nsọ Chiokike gbawarụ ẹbo hite n'olu dụ ẹli.

39 Nga nye risi ọgwnu nẹchi otu riwhu ele ọgwnu gwuzo ndundu kela ruwhnu hne ọ zị, whnurnu kpa

[†] 15:33 *n'esilawuru iwhnehnie*: ọkwukwo ke mbọm kwuru ige awa isunu [‡] 15:33 *ọtnu-ige ke ẹto*: ọkwukwo ke mbọm kwuru ige awa tolu

o jiri kna inwe, ọ kaa, “N’ezi, nyerukna ka buri Nnwọ Chiokike.”

⁴⁰ Ele rinya zị ikere neelekiri nhne neeme, agwna be bụ Meri Magidalini, nụ Meri nne Jemisi ke matị nụ Josis, nụ Salomi.

⁴¹ Ele ka snornu Jizọsi nga ọ zị nụ Galili, ele neeznenu a izi. Nụ agịda ele rinya berere ele snornu a va Jeruselem.

Be liri Jizọsi

(Mat 27:57-61; Luk 23:50-56; Jọn 19:38-42)

⁴² Nga ọ dūru ogbednachi, hne ọ bụ ọbochi ojikn-ernu, ke bụ ọbochi begwu Ọbochi Ozukwa Inwe Ọsno,

⁴³ Josefu nye Arimatiya varu, nye bụ otu nụ ele ikpe, bụ masị nye be nọsobisinu, nye neese ẹli-eze Chiokike, nwerukna ka ji anya rikne znekwnusi Paileti rịo a iznu Jizọsi.

⁴⁴ Ọ gbagwojiri Paileti anya nụ Jizọsi nwunam. O sukwu nye risi ọgwnu wam sịkwa a ma ọ nwuna.

⁴⁵ Nga ọ mahiari n’ọnu nye risi ọgwnu wam nụ Jizọsi nwunam, o kweru be vute Josefu iznu a.

⁴⁶ Josefu zuya ikpe marnu mma, nga o vudnarnu iznu a, ọ whu a n’ikpe marnu mma wam, vubna a nụ rime ilili ke be gwuhari nụ rime rugwu. O gweru otu rugwu kpusni ọnu ilili wam.

⁴⁷ Meri Magidalini, nụ Meri nne Josis whnurnu hne o liri a.

16

Jizọsi lizọru n’enwu

(Mat 28:1-8; Luk 24:1-12; Jọn 20:1-10)

1 Nga Ọbochi Ozukwa Inwe wheru, Meri Magıdalini nı Meri nne Jemisi, nı Salomi, zıyaru mọno neesni ẹknarna ọma zı ọdo n'ọdo ma be zne te iznu Jizọsi mọno.

2 N'ọnu ọsisi n'ọbochi mbọm n'ikwezu, be znernu n'ilili a nga ẹhnam warı.

3 Be nookwurita n'ẹhni be, “Nyele jookpumenu aı rugwu wam n'ọnu ilili?”

4 Nga be lelizọru anya be whnırnı nı be vumenem rugwu wam. Ọ zı rınya k'agıda.

5 Be bna rime ilili whnı wikoro dazıgwı n'akarikwnunga, o wogwu awura abọchna, ogwnu tıru be.

6 Ọ kanı be, “Ogwnu tıko anı. Anı noopio Jizọsi nye Nazareti, nye be kpọgidnernı n'ọgba. Ọ lizọlam, ọ zıla hna. Le hne be bıtaru a.

7 Kọvu anı la, kanı ele sno apna a nı Pita, ‘O belem anı ọsno neezne Galili, anı jọowhnu a pı, lele kpa ọ kannı anı.’ ”

8 Be whọga, hi n'ilili wam gbahala, ẹhni naama be ririri nı ọgbagwoji anya jigwu be, ọ zı nye be kannı nhne ọbula, kwnornı nı ogwnu nọtu be.

*Jizọsi mernı Meri Magıdalini
whnı a anya*

(Mat 28:9,10; Jọn 20:11-18)

[
9 Nga Jizọsi hiri n'ẹnwu lizọ n'ọnu ọsisi n'ọbochi mbọm n'ikwezu, o beru ọsno gesi ẹhni a Meri Magıdalini, nye ọ chıhalaru renwu ọjo ẹsau nı rime a.

10 O zne kanı ele nı Jizọsi dazıgwı nı mbọm hne be zı naagba mkpe, naakwna ẹkwna.

11 Nga be nurnu nu Jizosi zi budnu, nu ya n'iwuhuru a whnurnu a, be kwéle.

12 Nga ka wheru, Jizosi mernu badnu lawuru whnu a n'ozizi berere nga be neezne aznu mba.

13 Be lahna zne kanu ele gwnarnu, be kwéle nhne be kwuru masi.

14 Omekwo, Jizosi whuya iwuhne hne nri nu otu badnu wam ele sno apna a zi neeri wiri. O bnanu be mbna kwnornu n'okwe ekwe be nu mkpoma osi rikne be, ke mernu be kwéle ikwu-onu ele whnurnu a nga o hiri n'enwu lizo.

15 O kanu be, "Anu zne nu kpakara owa kponu kpakara badnu okwo izi oma.

16 Nye kweruru, be wu a mini, bu nye be jooznohia a, nye ke kwéle, be jaama a ikpe.

17 Nhne elekema ele ka joosno ele kweru, be jaachihala renwu ojo nu rewhna m, be jookwu oka nu riro ikne zi odo n'odo.

18 Be jaachi agwo n'aka, o buru nu be nwọ nhne obula ke jaakpaya enwu, o za nhne o jeeme be, be jotukwasi ele nriria aka, mee ehni buru be oma."

Jizosi laru n'oligwe

(Luk 24:50-53; Ernu 1:9-11)

19 Nga Nyenwe ai Jizosi kwukwonnu be oka, be gwelizo a la n'oligwe, o daziri eli n'akarikwnunga Chiokike.

20 Ele sno apna a whogaru nokpo okwo izi oma hne obula, Nyenwe ai noosno be, nornu enu, neegesi nu ikwu-onu Chiokike bu ezi oka, hite n'ernu ndu-ehni zi odo n'odo ke be nornu.]

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwerre - (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

c17ee3a1-1c7a-5c05-8e0f-5043e8228d89